



中州金石記

十五

經訓堂叢書

脩

沈祖燕署

1429
15



自京兆杜陵朱已下尤摩滅不可辨今據打本及王澍竹雲題跋約略釋之其字以墨圍別之者顧王所見今本所無也隸釋缺載此闕顧炎武譏之是也其不載開母闕則以其篆也洪适本不取篆書嵩高字作崇見漢時尚無嵩字地理志有嵩高縣云古文以嵩高為外方山也國語夏之興也融降于崇山韋昭注崇崇高山也據此知經典有作嵩或作崧皆後人所改矣竝天四海即以並為普並普聲相近于五音同為羽也故說文普以竝為聲徐鉉刪聲字徐鉉繫傳本有云傳寫誤多之非也地里志嵩高有太室少室山廟賴有此闕以考其遺也

少室神道石闕銘 篆書在登封縣西四十里邢家鋪

西闕額文云少室神道之闕六字三行下二層上層畫走馬人下層畫兩螭龍見褚峻金石圖南面西側銘及題名文云口菽林芝縣日月而口口口三月三日郡陽城縣興治神道君丞零陵泉陵薛政五官掾陰林戶曹史曼效監廟掾辛述長西河園陽馮寶丞漢陽翼秘後廷掾趙蘇戶曹史張詩將作掾嚴壽廟佐向猛趙始後畫月中兔杵白詹諸今存下層畫蹴鞠人凡四人見褚峻金石圖今摩滅東闕題名云口孟李陽根仲潘除鄭孟根盛潘陽口文令常口口口重令容上二層有畫一層畫犬逐兔一層畫一人牽獨角獸鉤服一象今存地里志嵩高有少室山廟唐楊炯少室山少姨廟碑云少姨廟者則漢書地里志嵩高少室之廟也其神為婦

人像則故老相傳云啟母塗山之妹也即此園陽不作園見漢時無園字說文所以不載闕字从巛此作軟从芊寶字从缶今从尔漢人不拘六書如此故秦隸行而篆學微許叔重之功甚大

宛令李孟初神祠碑 永興二年六月立隸書在南陽

題云故宛令益州刺史南郡襄陽李字孟初神祠之碑文云府除缺郎中遷缺史卒官缺

宛民追思缺更訊治立碑復祠下缺垣宇樹木皆不缺中大人共案文缺永興二年六月已缺

十缺宛缺部勸農賊捕掾李龍南郡缺屋有守祠義民今聽復缺追缺時令琅耶開陽貴君諱

河南雒陽虞衍字元缺仲興缺漢缺功缺伯缺時皆美劉缺艾缺戶缺伯缺元缺時賊缺掾

李龍升高缺京缺曹掾缺任功賞缺史缺時亭長張河寧海亭缺唐諱伯祖缺此碑題首二行

行約十五字文十三行行二十八字第一行故宛令益州刺史云云字大三寸其文字僅半之

中有穿惜半摩滅不可復辨碑新出土故前此金石家多未及載今錄其可辨者如右蓋因李

孟初官宛有德政義民因為立祠也書法疏秀似韓仁銘當為唐蔡有鄰所本永興二年字

末一筆甚長過兩字于漢碑少見

開母廟石闕銘 延光二年立篆書在登封啟母廟南

官中郎將陽陵堂谿伯并熹平四年來請雨崇高廟典大君諱協字季度自爲郡主簿作
口銘文後舉孝廉西鄂長早卑終敘曰於惟我君明允廣淵學兼游夏德配臧文殺而不
死實有立言其言惟圖云云下缺洪适隸釋顧炎武金石文字記俱未載此文惟見金石錄
及褚峻金石圖按後漢書延篤傳云少從潁川唐溪典受左氏傳章懷太子注引先賢行狀
曰典字季度爲西鄂長今闕云字季度又云舉孝廉西鄂長卽其人也靈帝本紀云熹平五
年四月復崇高山名爲嵩高山章懷太子賢注引東觀漢記曰使中郎將堂谿典請雨因上
言改之名爲嵩高山卽此事矣蔡邕傳云熹平四年邕乃與五官中郎將堂谿典等奏求正
定六經文字靈帝許之章懷太子賢注引先賢行狀曰典字子度潁川人爲西鄂長又知爲
潁川人其堂作唐字之異季度作子度者字之壞也當從碑作季
聞熹長韓仁銘 熹平四年十一月立隸書篆額在滎陽縣署

碑文滿右方大半中有穿左方有正大五年趙秉文題又有李口題又一行云正大六年八
月口日奉政大夫滎陽縣令李天翼再立石又有石匠王福名此因碑仆重樹非重刻也按
釋名云銘名也記名其功也銘固不必有韻褚峻言其文辭不叶於聲詩失之矣褚又摹勛
字誤作勛大謬充率短命卽不發短命漢隸字源載逢盛碑命有悠短亦如此充卽篆卽字
之變率實率字音達今以爲喬漢人別字趙秉文金史有傳

豫州從事尹宙碑 熹平六年四月立隸書篆額在鄆陵

碑云尹吉甫元孫言多世事景王載在史典按春秋左傳襄三十年五月癸巳尹言多劉毅單
蔑甘過鞏成殺佞夫卽其人也又云故子心騰於揚縣致位執金吾子心名賞見漢書酷吏傳
碑寫襄爲襄僂爲僂寢爲寢皆別字潁川郡以水名俱寫作潁漢唐碑亦多似此豈古人假借
俱通邪顧炎武斥其位不福德福爲副字之誤實亦假音而非誤字

熹平石經尚書論語殘字 光和六年立蔡邕隸書拓本

漢石經尚書論語一百二十餘字黃通守易得之京邸或以爲孫侍郎承澤藏本卽何氏焯云
越州石邦哲重摹者或按隸釋所載爲政篇由誨汝知之句多一女字謂是熹平原刻予不得
而定之特愛其文之有關經學也今本尚書盤庚石刻作般庚不石刻作不論語人焉度哉人
焉度哉石刻無下哉字猶文字之小異耳至盤庚篇不其或稽自怒曷廖石刻稽作迪怒作怨
迪進也言不進而遷居勝僞孔義多矣爲政篇孝乎惟孝友于兄弟石刻作孝于攷釋文本亦
作孝于惟云一本作孝乎而已是唐時板本尚與漢合包咸注云孝乎惟孝美大孝之辭潘岳
閒居賦引孝乎惟孝友于兄弟亦皆讀乎同于字雖改而意不易未嘗以孝乎斷句也堯曰篇

簡在帝心石刻從艸作簡者自是隸書之體古無簡字惟詩云方秉簡兮傳云簡蘭也釋文云若作竹下是簡策之字耳不知蘭字亦以東為聲東與簡通古人假借何不可以簡為之乎予方著詩詁當引此以証詩字今世石經之存惟熹平此本及開成嘉祐宋高宗御書意蜀石經亦有存者而未之見往官關中訪開成石經于西安府儒學後舍失去十餘石余遍加搜剔于積垣敗土中得之復為排比甲乙覆以廊廡遂復舊觀以墨本恭呈

乙覽

勅入天祿琳琅今移撫中州見嘉祐真篆二體殘字又得假此本以入中州金石錄所至之處皆與先聖遺經相值幸得題名碑末心竊樂之黃君所藏金石最富每獲宋搨本必索予跋尾并以屬幕中好古之士翰墨之緣亦一時之盛也

永康鏡銘 永康元年正月篆書乾隆五十一年正月得在開封市上

鏡畫佛像甚工致字在方格中凡四字文云永康元年正月丙午黃白作竟幽凍三商明如日月買者富昌口高作官立至公侯天王日月上有東父式西王母宜吉孫子以立為位金石常語孫作市蓋子字之意鏡徑七寸藏于家按鄭康成注儀禮云日入三商為昏孔穎達疏商謂商量是漏刻之名永康漢桓帝年號晉惠帝亦有之攷晉惠永康元年正月壬戌朔則此月無

丙午也漢桓永康元年正月乙酉朔則其月廿二日是丙午也

魏

公卿將軍上尊號奏 延康元年立隸書篆額在許州繁城鎮

碑載勸進之祠裴松之注三國志有其文按碑云可謂信矣著矣口矣裕矣高矣郡矣志作可謂信矣省矣碑云民命之懸於魏邦民心之繫於魏政志作民命之懸於魏政俱是傳寫脫文餘文亦稍有異當以石刻為正集古錄云唐賢多傳為梁鵠書今人或謂非梁鵠也乃鍾繇書耳未知孰是也

受禪表 黃初元年立隸書篆額在許州

碑文不載于史水經注云繁昌城內有三臺時人謂之繁昌臺前有三碑魏文常受禪於此故其石銘曰遂於繁昌築靈壇也於後其碑六字生金論者以為司馬金行故曹氏六世遷魏而事晉即此碑及尊號碑靈怪之事儒者不言姑存此說以明碑之奇異或俗人聞而保護之也劉禹錫嘉話云王朗文梁鵠書鍾繇鑄字謂之三絕集古錄云世傳為梁鵠書而顏真卿以為鍾繇書意當時奉詔旨刻石必用名人書法不出此二臣耳漢隸字源云碑在潁昌府臨潁縣魏文帝廟內今為漢獻帝廟者後人毀斥文帝像復為之也

帳構銅銘字 景初元年五月造隸書

銘凡三十二字云景初元年五月十日中尚方造長一丈廣六尺澤漆平坐帳上廣構銅重二斤十兩近人厲鶚曾賦七言古詩按其器出于西京雜記云哀王冢得石牀方七尺石屏風銅帳構一具似是帳糜朽而銅鏤墮落銅帳構之名始見於此攷古以木為帳謂之曰櫪俗作若今公府暖閣前施帷幔此云帳上廣構銅構之言蓋廣之言橫乃橫木裏銅所以蓋帳者西京雜記作鏤字之俗也

王基墓碑 景元二年四月立隸書在洛陽

文云子有成父者出仕于齊獲狄榮如孫湫違難為萊大夫遂稟天素皓爾之質兼苞五才九德之茂慈和孝友既著於景山林元本道化致思六經剖判羣言綜析無形文辯瞻民忠正足呂格非兼文武之上略懷濟世之宏規初舉孝廉司徒辟州輒請留呂自毗輔後辟大將軍府拜國典惟新出為安平安豐太守敦崇惠訓典刑惟明四躬呂允帝命遷荊州刺史揚武將軍又遣使持節鎮南穴朱旗所麾前無交兵克敵獲僂斬首萬計賜爵關內侯缺 賈諸夏震蕩王師雲集公翼亮無遺策舉無廢功故能野戰則飛虎摧翼圍城則鯨鯢於九有也比進爵常樂亭安樂卿東武侯增邑五千戶之葬征有獨克之威而忠勤之性乃

心帝室屢奏封章 留年七十二景元二年四月辛丑薨公天姿高素與亡則令儉斂已

時服於是將矩奉册追位司空贈曰東武侯密印綬送以輕車介泰山之速積恨元勳之未遂俯仰哀歎永懷惓惓曰為策鏤石表墓光示來裔其辭曰塞憲章墳素昭此物則居則利貞在公畢力化流二邦寧民是用息升降順道德讓靡忒曾不愆遺我按碑近世出土故載其全文以續隸釋所不及王基陳壽魏志有傳以碑証之多合惟碑云遷荊州刺史揚武將軍史誤作楊烈碑云又遷使持節鎮南將軍下缺當是將軍云云在克敵獲僂賜爵關內侯及母邱儉文欽作亂之前史則云欽等已平遷鎮南將軍亦在擊吳賜爵之後未知何也其小異者碑云克敵獲僂斬首萬計史云隨征南王昶擊吳虜安北將軍譚正納降數千口或碑有浮詞碑云增邑五千戶史云增邑千戶并前五千七百戶碑蓋合前舉大數言之耳史云基母卒詔祕其凶問迎基父喪合葬洛陽今碑出于此者知基附父母家而方志缺載也基之死既贈官封子孫又賜其家奴婢而此碑云策鏤石表墓則亦奉勅所立而史缺載也世傳碑之出土僅刻其半上截朱字宛然應手而滅本非殘缺未知審否三國時刻石惟有九真太守天璽紀功國山碑及受禪上尊號封孔羨碑數種久為世所傳摹邇年創見諸碑尤多奇偉若子在關中訪得褒城李苞石門題字孫孝廉星衍游句容訪得吳衡陽太守葛祚碑及此皆金石家所未著錄足與

史傳發明殊可寶也碑字波畫分明唐以前石墨無能與之匹者葛祚碑遂為楷書碑刻之祖亦稱二絕云

晉

鏡銘 太康元年造篆書儀封河上所出

鏡字摩滅惟年號及宜子等數字可辨今藏黃通守易家

太公呂望表 太康十年三月立隸書隸額在汲縣

董道廣川書跋載此碑今碑僅存半截隸額云齊太公呂望表文有齊太公呂望者此縣人云

云即穆子容碑前所錄也董道所載文多錯誤賴碑存以証之水經注云汲縣故汲郡治城北

三十里有太公泉泉上又有太公廟廟側高林秀木翹楚競茂相傳云太公之故居也晉太康

中范陽盧無忌為汲令立碑于其上今此碑云來為汲令蓋即無忌碑也後缺年月以穆子容

碑載有晉太康十年三月丙寅朔十九日甲申盧無忌依舊修造云云知之

劉府君墓志 隸書在偃師武進士億家

題云晉故使持節都督青徐諸軍事征東將軍軍司關中侯劉府君之墓君諱韜字泰伯叔考

處士君之元子也夫人沛國蔡氏凡四十七字關中侯出魏書云侯爵十八級關中侯爵十七

級關內外侯十六級者是也

魏

始平公造像記 太和二年九月刻正書陽文在洛陽

額云始平公造像一區區字不从土知元寧作堰者俗字也碑寫啟為啓渴為渴豕為棘為

棘皆別字字之變體莫甚于六朝故備論之也

孫秋生等造象記 太和七年刻孟廣達文蕭顯慶正書在洛陽伊闕

上截孫秋生等一百人記下截列唯邢程道起等名末又有景明三年五月造字樣其文寫顯

為顯者省字猶濕作濕也寫葩為葩知今俗所傳花字乃此字之行草以為華字異文去之甚

遠文選琴賦李善注引郭璞曰葩為古花字後漢書張衡傳思元賦太子賢注引張揖字詁曰

葩古花字也是古人已言之亦足為証條作捺標作樹鼓从皮見加現皆其至謬者

楊大眼為孝文造象記 正書有額在洛陽

大眼武都氏難當之孫魏書有傳碑云輔國將軍直閣將軍口口口梁州大中正安戎縣開

國子官與史合史惟不及梁州大中正及安戎為安成傳寫之誤耳碑云彭王衢於三紛掃雲

鰈於天路寫清為靑鯨為鰈皆別字又云南穰既登震傲歸關傲即旅字其寫舍為哈稟為稟

覽為覽矚為矚功為功皆別字未有武字似下有年號未了

華州刺史安定王燮造石窟像記 永平四年十月刻正書在洛陽
記云假節督華州諸軍事征虜將軍華州刺史安定王仰為祖親大妃先太傅靜王妃
蔣妃敬造石窟一軀魏書安定王休傳云蠕蠕犯塞出為使持節征北大將軍撫冥鎮大將休
身先將士擊虜退之入為內都官遷大傅及開建五等食邑二千戶薨謚曰靖王即此所謂
太傅靜王也靖靜同字傳又云次子燮除下大夫世宗初襲拜大中大夫除征虜將軍華州
刺史即造像人官爵悉合史無假節督華州諸軍事乃其疏記文皇魏字從委鬼聲與古
文合俗皆省山又云依巖覆宇以哀為抱亦用古字惟字作字謬甚

熒陽太守元寧造象記 孝昌二年正月刻正書在熒陽

文云大魏孝昌二年歲次丙午正月辛丑朔四日甲子熒陽太守元寧仰為二聖敬造石
像一軀額主上万祚臣僚盡忠後宮皆閭頽天下太平四方慕儀又額曰考生天安養國
土上下延壽兄弟眷屬含靈有識蠢動眾生普同斯福鬼龍山岳靡不慈仁所願如是其
借熒為榮借儀為義猶有古意至寫區為區潤為潤延為延蠢為蠢皆別字
懷令李超墓志 武泰二年正月立正書在偃師

碑稱正光五年卒越六年始葬按明帝正光六年改元孝昌孝昌三年改元武泰核其時
當是武泰二年也云秦州隴西郡狄道縣都鄉華風里人又云卒于汝陽縣之承年里皆
古里名又云葬洛陽縣覆舟山之東南太平寰宇記偃師縣有覆舟山陶季述京邦記云
周回二十里有白水苑是也此云在洛陽者與偃師接壤銘詞云眾寶巨蓋巨者巨測
之意蓋出說文序云是非無正巧說衰辭使天下學者疑蓋然則蓋者疑不定之意耳又
云楨樹疎疎則爾雅拍掬是也

中嶽嵩陽寺碑銘 天平二年四月立隸書碑後刻大唐麟德元年九月從嵩陽觀移來會
善立一行

洛陽伽藍記云嵩高中有嵩陽寺即此是也碑云司空公裴衍昔在齊都欽承師口頽歸
中國為寺檀主本願既從雲歸云云按魏書列傳云裴粲弟衍字文舒仕蕭寶卷景明二
年始得歸國授通直郎衍欲辭朝命請隱嵩高又云贈使持節車騎大將軍司空相州刺
史蓋其隱時與生禪師有舊也碑文寫宗為劣寫為為軌為軌拊為拊東為東殿為殿度
為庶險為嶮館為館飭為飭絜為絜航為航皆別字云對眾山之楯列列當是紐字又云
潺流瀆瀆瀆瀆即濺字正文三倉云瀆瀆瀆也江南言瀆山東言瀆以今方音定之亦信為

濺字顧炎武以爲潛字之俗非也又云預捨一豪豪不从毛用古字葉封說此碑上截刻佛相極工中有空方六寸許

造須彌塔記 天平三年正月立正書在偃師

文云大魏天平三年歲次丙辰正月癸卯朔合邑等敬造須彌塔一壠仰爲皇帝陛下師僧七世父母所生父母因緣眷屬後爲邊地眾生常與善居弥勒三會唱在初口下生人間侯王長者合邑諸人所願如是下列邑師比丘唯那等名中有佛象長六寸字畫鋒穎透露可想見六朝筆勢碑在偃師北十八里古聖寺此寺意卽魏時所立縣進士武君億得于土中急置寺壁手拓其文寄予真好古敏求之士也

禪靜寺敬顯儁碑 興和二年立正書在長葛

碑紀顯儁歷官最詳云解褐奉朝請封泰平縣開國子除晉州別駕進封永安侯食邑千戶拜車騎將軍度支尚書俄遷都官尚書爲汾州刺史尋轉晉州刺史車騎侯如故拜儀同三司加拜驃騎大將軍潁州刺史大都督潁州諸軍事儀同三司開國如故按北齊書列傳云爲晉州別駕行臺倉部郎中轉都官尚書北史惟云歷位度支尚書封永安縣侯出內多歷顯官而已碑獨不及行臺倉部郎中宰相世系表又云北齊僕射史又不載不

知何也齊書北史世系表皆云顯儁字孝英碑則于公名下缺一字云字顯儁亦不同此碑以梁洪雅建寺顯儁重修故爲是銘後有新除潁州刺史崔叔仁名碑字最謬不可勝舉其云百城旆輝乃施析異文弱齡聰瑋乃聰睿假音惟匈矜作匈猶用芻字正文與篆法合碑出于乾隆初年長葛民墾土所得字蹟完好

碑陰

陰列官將民望沙門名字所載故氏之族甚多有主薄敬頴攷宰相世系表在顯儁上第三格云頴後魏北絳太守乃是顯儁之曾祖不應于顯儁立碑時列名碑陰蓋或是族曾祖行而世系表誤分其格正直顯儁之上也

李洪演造象記 武定三年三月刻正書在獲嘉縣法雲寺

文云夫靈光郁烈雖體洞口塵然一乘覆運則十纏競發故釋迦出沒口有其口也是以邑義口皆籍出蘭蕙秀貫烟雲悼純暉之日削恨重閭之年深遂相戀捨爰置嘉石於此爽塏營像一區庶鍾万品等階十號頌曰湛矣澄源修哉寶觀息彼摸擬邁茲陳讚事等手足道猶花粹遠还口津清濁交判有釋迦興體苞暉達淨樂蕭然常我無過三口是填五蓋終脫六度告口雙林顯末於穆邑義廣夏之樑爰樹瑱像髣髴遺光功口先祀福潤

見方咸口口吉永拔宿霜武定三年三月一日造訖凡二十三行前一行云邑子李洪演疑即其自書也此石字體端嚴筆鋒秀勁為魏齊造像第一今世所傳王獻之洛神賦善之樂毅論等或出自唐宋人鈎摹重刻本猶珍惜臧護是書精美媿之又是魏時真本當何如寶貴耶

魏邑主造石象銘 武定六年八月立正書在偃師

碑文云大魏武定六年八月戊辰九月己未朔十二日庚午邑主_{字空八}敬造石像碑文夫元精曠迓妙理冲深至道不廓幽蹟難覩故像物開光出于恍惚之中法相倫暉生於希夷之外曠彼口山結王子之口想睠茲口水闡九龍以成津瞻口堂堂若穹旻之帶曜霽尋之杳莫若遊霞之登九霄口口正覺焉可宥_{同究}哉故佛弟子邑主_{字空八}等導流形宛翫光嵩洛據口衡口道冠中鼎然自叻生逢隘運形沉邱壤識果業之可崇知真筭之有期恐朝露之命覩太陽而旭晞草木之年隨秋霜而降墜怙侍先霽凶極之功弗展幼子遐衰覆育之恩靡託遂罄竭家資口引邑義構像通衢崇慈寶業我若嶠谷之濱條蕩平原之里背祗邱叻樹形跨蘭高而建宇庶能使七世幽魂趨處天堂之中前亡後死勉脫八難之苦爰及胄允口口相承軒蓋重輝窻口繼口入衛鈎陣出宰蕃岳台鈞相望珪璋疊

影奔口翁蔚流載篆素伏願皇道雍熙景命維新駿奔載馳我淚交輸行蘆歌德霜豎被澤裔錄再炳升口吉始凡厥蒼生咸蒙斯福乃作訟曰聖迹啟元聖道永真國王非寶儲二匪环捐妻施子外若遺塵金軀靡怪望庸投身遂登正覺神通自然群魔稽首靈冠諸天慈悲万有光照大千苞綸曠劫仰之弥元擾擾群生有善有惡報應如響隨心降穽磬茲懋果庶勉鼎鑊覲拔幽魂選神妙樂伏願皇家景祚康延解鞅桃林釋轡_{即轡}華山蒲車巖阿訪逸求賢孤竹捨微黃綺執鞭誹木徒設諫鼓空懸導茲邑義採石嵩陽方琢是育樹此福堂勒碑啟像跨躡崇口壽之皎皎千載流芳按此碑前人俱未著錄故載其文如右云邑主敬造石像碑文邑主下及故佛弟子下俱空八字無人名本非殘缺當時待填姓氏耳文與字亦頗拙其別體甚多然云仰之弥元元遠也又云隨心降穽落也又云磬茲懋果當借為腆字多也見六朝時人猶能用古字古義今則文章日尚通俗不出尋常行用之字矣

太公呂望碑 武定八年四月立穆子容撰正書在汲縣西北三十里太公廟

水經注云汲縣故汲郡治城北三十里有太公泉泉上又有太公廟廟側高林秀木翹楚競茂相傳云太公之故居也晉太康中范陽盧無忌為汲令立碑於其上今碑前有晉太康十年三月丙寅朔十九日甲申盧無忌依舊修造錄無忌文九行蓋晉碑已泐子容書之于石也後十

二行爲穆子容文北史穆崇傳云子容少好學無所不覽求天下書逢卽寫錄所得萬餘卷魏末爲兼通直散騎常侍聘梁齊受禪卒于司農卿今碑云通直散騎常侍聘梁使與碑合又云平東將軍中書侍郎恒州大中正修左史汲郡太守史所未及碑額有象有碑陰書太公裔孫尚姓諸人

盧文云太康口口縣之西偏有盜發塚而得竹簡之書書藏之年當秦坑儒之前八十六歲其周志曰文王夢天帝服元纁以缺帝曰昌賜汝望文王再拜稽首太公於後亦再拜稽首文王夢之之夜太公夢之亦然其後文王注之曰名爲望乎荅曰唯爲望吾如有所見汝太公言其季月與日且盡道其言臣此以得見也注與之跡以爲卿士與史記不同又云嶓嶠之下舊有壇場按水經渭水又東過陳倉縣西注磻谿谷谿中有泉謂之茲泉卽呂氏春秋所謂太公釣茲泉也今人謂之凡谷東南隅有石室蓋太公所居也水次平石釣處卽太公垂釣之所也其水清冷神異北流十二里注於渭括地志茲泉水源出岐州岐山縣西南凡谷則此水在今陝西寶雞縣東南其在汲縣者水經注又爲之說曰人亦謂之磻谿太公避紂之亂屠隱市朝遜釣魚水何必渭濱然後磻谿苟愜神心曲渚則可磻谿之名斯無嫌矣予按二說俱古當以寶雞之磻谿爲長以其爲茲泉出于呂氏春秋也此碑書法方正筆力透露爲顏真卿藍本魏齊

刻石之字無能比其工者

孝文帝弔比干文并陰 太和十八年十一月立正書陰元祐庚午林舍書在汲縣比干廟碑陰記云比干書舊有元魏高祖弔文一篇摸鏤在石其體類騷其字類隸久已爲鄉人毀去賴民間偶存其遺刻則此乃宋時重刻本也故附于魏碑之末金石畧有後魏孝文帝弔比干文注云衛州有碑陰今亡蓋言原刻本水經注清水東南歷毋野有殷大夫比干墓太和十八年十一月車駕幸鄴甲申經比干之墓親爲弔文樹碑而刻之卽此

殷比干墓題字 隸書在汲縣墓上

金石畧有後魏比干墓刻卽此水經注清水東南歷毋野有殷大夫比干冢前有石銘題隸云殷大夫比干之墓所記惟此今已中折不知誰所誌也按今惟云殷比干墓是又非酈道元所見之刻矣漢隸字原云石公弼跋云上世傳孔子書然道元鄭樵俱不謂然周時亦無隸字足証世俗流傳之妄也其字當有舊刻魏人復書之故又脫大夫二字漢隸字原謂當是漢人書玩其筆蹟亦非也

白馬寺造象幢 正書在洛陽寺內

經言堂書
幢無蓋坐在白馬寺大殿左側苑中錢別駕站自西安來汴過寺門搜得此石手拓以歸文
摩泐不可讀作五十餘佛象上下左右俱有題名但辨邑子某某而已審其製度筆法為魏
人所作無疑

齊

清河王高岳造西門豹祠碑 天保五年立正書在安陽城隍廟

碑云使持節驃騎大將軍開府儀同三司州司馬州口口師清河王岳者齊書列傳云顯祖出撫
晉陽令岳以本官兼尚書左僕射留鎮京師天保初進封清河郡王尋除使持節驃騎大將
軍開府儀同三司宗師司州牧蓋以此時立碑也明一統志云西門豹廟在府城北大夫邨
北齊天保年建碑刻尚存今碑缺年月太平寰宇記云鄴縣西門橋齊天保五年僕射魏收
為碑存焉則碑是天保五年魏收所撰無疑碑故在豐樂鎮廟內知縣彭某移于城隍廟中
水經注云漳水逕武城南又東北逕西門豹祠前東側碑隱起為字祠堂東頭石柱柱勒銘
曰趙建武中所修也魏文帝述征賦曰羨西門之嘉迹忽逕睇其靈宇寰宇記又云鄴縣西
門豹祠隋圖經云在縣東南七里北臨太平渠或恐碑移而祠基且將迷失矣趙建武石柱
銘又非汝帖所載石趙鄴祠柱刻也其刻宋時猶存倘有好事者一訪之乎碑篆額云西門

君之頌

碑陰

陰列官吏題名有云散騎常侍趙郡王州都郭海高下缺名者高叡也齊書列傳云顯祖受
禪進封爵為南趙郡王邑千二百戶遷散騎常侍以此知之郭海字見說文今史皆作渤知
六代人書猶無俗字也碑又有元韶穆子容銜名元韶齊書有傳云龔封彭城郡王歷位太
尉侍中錄尚書司州牧進太傅齊天保元年降爵為縣公此云射彭城縣開國公州都者其
降爵也史不及開國公州都乃其疏穆子容見北史穆崇傳是時為平東將軍別駕從事史
亦可据碑以補史也

在孫寺造象碑并陰側 河清三年四月立正書在登封蔣莊

碑文剝蝕須善打本方能辨之其字若篆若隸古雅可觀今伊陽內埠廣興寺殿左階下亦
有河清造象碑當一時所為前金石家未之著錄

姜纂為亡息元畧造象記 天統元年九月立書在偃師

文云大齊天統元年太歲乙酉九月庚辰朔八日丁亥男官姜纂為亡息元畧敬造石像壹
軀空夫靈暉西沒至理東遷畫盡神明像窮變現道遷業峻因藉報遠清信士姜元畧志隆

邦國仁越州間衡巷仰風鄉邑譽望早洞元源風達空旨而石火電爛德忽從化松摧落岫
蘭影夏霜寶散闍泉玉碎黃壤父慕情慕東門心憑冥福特爲亡略敬造先君像壹軀左右
二侍聖相真容妙絕娑婆雕檀刻削波斯惡奇鏤金鏤石優填慙巧神光照爛遍滿閭浮香
氣氤氳充塞世界業盛飛行事符踊出以此勝因追資亡略登淨境獨步虛空逍遙天服
乖祿出六塵遨遊慧體長超八難彈指則遍侍十方合掌則塵奉衆聖過去尊卑見存眷屬
亡生淨鄉現獲妙果當來龍華頓昇初唱皇家慶隆澤治遍地三途楚毒俱辭苦海六道四
生咸蒙勝福壹切有形同成正覺按此碑及武平七年孟阿妃造象記皆近年出土偃師武
進士所搜得者前人俱未著錄故悉載其文文中別體甚多惟爛作爛用古字

天統造象記 天統三年二月立正書在洛陽

碑字似隸似楷極爲古雅菩薩字卽菩薩也故一切經音義云作扶薛蓋聲之轉耳六朝隋
唐皆作薩不从產字可証也其寫契爲契彌爲珍華爲華受爲受見爲現皆別字寫前爲肯
壹爲壹善爲善滅爲滅皆古字其借堪爲龕省圖爲圖異文也前列邑主維那香火等人各
後列洛州諸官姜範皇甫迴趙恩榮三人銜名

丈八大象記并陰 天統五年五月立正書在許州關帝廟

碑文云□□□衆相理融是非□□□慈悲爲懷引清五濁□□□權宜朗鑒万法隨緣根
□□□雙林緣盡居尸遂能使□□□搆剎旨撥波斯况後未□□□不仰慕聖容者茲是以□
義一百人等以今大齊天統五年歲在丁亥五月十五日共造丈八大像七軀上爲皇家承
康下爲群品師僧□□毋累劫回緣四生洽識悉捨忘想同登正覺□□其訟曰殿蓮基尊像靜
嘿聲聞菩薩侍立其側徒衆和雅僧□藏飭禪誦歎誦晝夜無息以此福緣壽報無極其置
福處也北連名山太邱之廟南有高岵胡城巩固處在中央同悟水東注人民□祥營造福
業上爲帝皇四海歸湊壽樂□壇以斯願力俱會道場□邑義諸人皆元出四海據□□川
礼教自防德達仁□□□爲尊以法爲□欽敬二□□□歸投以斯福緣元□□□□□□
□□□後列邑子比邱唯那名此碑前人俱未著錄故載其全文碑多別體字如寫不爲不
不爲不爲合作洽岡作岵之屬不可勝舉惟云其訟曰以訟爲頌合六書之義歌訟字从言頌
貌字从頁六代猶有知之者今以頌爲訟容爲頌則假音而非本義也

邑義造神碑尊象記 武平二年五月刻正書在洛陽

金石畧有齊佛龕碑注云天統三年立武平三年刊西京疑卽此碑亦多別體字借甚爲長
從爲蹤餘悉如今世俗書寫慳爲慳悟爲憇他碑未見

馬翊王潤平等寺碑 武平二年立正書在洛陽

碑稱高潤神武皇帝之稚子按北齊書列傳云馬翊王潤字子澤神武第十四子也鄭樵金石畧有北齊馬翊王平等寺碑云武平二年在洛陽知卽此碑今多摩滅又無年月矣金石錄載其文云寺魏廣平王懷所立永平中造定光銅像在寺外齊高祖始遷像入寺潤又增修殿宇焉洛陽伽藍記云平等寺廣平武穆捨宅所立在青陽門外二里御道北所謂孝敬里也堂宇宏美林木蕭森平臺複道獨顯當世寺門外金像一軀高二丈八尺相好端嚴常有神驗國之吉凶先炳祥異孝昌三年十二月中此像面有悲容兩目垂淚遍體皆濕時人號曰佛汗京師士女空市里往而觀之有比丘以淨絲拭其淚須臾之間絲濕都盡更以他絲換俄然後濕如此三日乃止明年四月爾朱榮入洛陽誅戮百官死亡塗地卽此寺也

都邑師道興造像并治疾方 武平六年六月刻正書在洛陽

刻凡二幅上有小釋伽像下有記述刻藥方及造象之事云都邑師道興乃抽簪少稔早託續門續卽緇字之俗耳下爲療上氣咳嗽腹痛體腫諸方

孟阿妃造象記 武平七年二月立正書在偃師

文云大齊武平七年歲次丁酉二月甲辰朔廿三日丙寅清信弟子孟阿妃敬爲忘夫朱元

洪及息子敖息子推息白石息康奴息女夏姬等敬造元君像一區今得成就頽亡者去離三塗永超八難上昇天堂侍爲道君芒芒三界蠢蠢四生同出苦門俱昇上道碑新出土其以忘夫代亡夫甚奇寅作寅雙作夏姬作姪蠶作蠶皆異文敖字未詳

董洪達造象記 武平九年正月立正書

碑文與字體頗劣寫月爲夕日爲○可爲奇爲崇猶帶篆勢餘亦多有別字按李仲璇碑隋陳思王廟碑亦篆隸相雜六代人往往如此無足怪者今世朱學士筠書翰古雅實有所据俗多譏之母乃不多見古碑碣歟予嘗見隋以前碑多帶篆隸而宋人傳摹諸帖悉魏晉六代人書並無古體大率唐人臨本依古人署名于後耳碑下列比丘齋主等人名其寫齋爲囊顧炎武斥其太繆然亦齋字之異文說文以齋爲齋緇字今借音耳不可謂非

武平造象記 武平五年十月立正書在汜水

碑止存上截姓名無攷

洛州卿城老人佛碑 正書隸額在洛陽賁陽洞

碑字摩滅額尙完好前列副像主張孝舒等名後云三十四人等口口敬造尊儀一龕上祚皇家碑末有大齊 十年正月廿一日字童鈺河南府志云金石畧有齊佛龕碑天統三年

立武平二年刊在西京不知此是非

魏靈藏薛法紹造象記 正書有額在洛陽

字體似楊大眼記瑋捺卽荆條別字也又寫標爲樹哈爲哈希爲希求爲求豪爲豪率爲率棘爲棘

隋

杜乾緒等造石像記 開皇十二年二月立正書在葉縣

碑分三截上截記中截銘下截題名銘文典麗字隸法古雅可愛

舍利寶塔下銘 仁壽二年四月立正書在河南布政司庫

金石畧有舍利寶塔下銘云仁壽二年未詳卽此碑云謹於鄧州大興國寺奉安舍利崇建神塔則當在鄧州不知何時移至開封也予所見仁壽元年塔銘尙有二皆隸書一在同州

一在青州府此文刻以圓石字亦古雅有六朝人遺意尤可玩也云頂戴歡喜說文喜樂也

憲說也義同其寫愍爲愍滅爲滅法爲活懇爲懇垂爲乘戍爲戍爲戍纏爲纏皆謬

鄭州刺史爲子造象記 大業元年口月立正書在滎陽南寺

碑文駢體字亦不工上有石刻佛像彫鏤極精按劉昫唐書本紀云高祖大業初爲滎陽樓

頰一郡太守刻石當在此時但史稱武德三年罷郡置州改太守爲刺史此在大業初已稱

刺史又何也劉昫書張仲方傳云仲方拜鄭州滎陽大海佛寺有高祖爲隋鄭州刺史日爲

太宗疾祈福於此寺造石像一軀凡刊勒十六字以識之歲久刊缺滎陽令李光慶重加修

飾仲方刊石記之以聞今此碑共百五十餘字蓋史作十六字傳寫之譌其文與字古拙似

是原刻非李光之所修飾尤可寶貴云衛護第子弟字从竹足証第卽弟變體今人分次第

字从竹兄弟字作弟謬矣銅文之字借彫一鋪之字借軀猶有古意寫寫不成字鄭樵金

石畧有鄭州刺史李淵造石像記云在鄭州卽此也

中州金石記卷二

賜進士及第兵部尚書兼都察院右都御史總督湖北湖南等處地方軍務兼理糧餉暫留河南巡撫畢沅撰

唐上

新建觀音寺碣 武德五年立陸德明撰正書在汜水

碑款式字體俱疑偽作或有其原刻後人復為之也碑云王世充竇建德為讐大邦我秦王赫然斯怒罪人乃得班凱還師駐蹕廣武按劉昫唐書本紀云武德四年五月己未秦王大破竇建德之眾於武牢擒建德河北悉平丙寅王世充舉東都降河南平秋七月甲子秦王凱旋獻俘于太廟正與碑合

等慈寺碑 貞觀二年口月立顏師古撰正書篆額在汜水

太宗破王世充竇建德乃于戰處建寺為陣亡將士薦福文中稱世充為王充因諱去一字耳朱晨墨池編作大唐皇帝等慈寺碑者額文也

伊闕佛龕記 貞觀十五年十一月刻岑文本撰褚遂良正書篆額在洛陽伊闕

集古錄有貞觀十五年三龕記云唐兼中書侍郎岑文本撰起居郎褚遂良書字畫尤奇偉三龕像最大乃魏王泰為長孫皇后造也寶刻類編云貞觀十五年十一月磨崖刻今

缺撰人年月据此書之洛陽縣志云賓陽洞舊有岑文本三龕石刻今失者誤也額篆書闕字作闕諺甚碑稱文德皇后道高軒曜云云又稱左武侯大將軍相州都督雍州牧魏王卽魏王泰子以丙午秋日閱視兵伍因過伊闕山訪賓陽洞見泰所造三龕佛像大五六丈其伊闕夾水兩岸石龕佛象數百皆後魏及唐世所鑿也龕之旁側往往有刻字惜不能徧窮其勝因憶水經注稱闕左壁有石銘云黃初四年六月二十四日辛巳大出水舉高四丈五尺右壁又有石銘云永康五年河南府君循大禹之軌部督郵辛曜新城令王琨部監作掾董倚李褒斬岸開石平通伊闕石文尚存也疑此刻磨崖不致失墜好古之士訪之當或能見焉故附識于此

贈比干太師詔并祭文 貞觀十九年二月立薛純陀隸書在汲縣

寶刻類編有此碑顧炎武以為重刻者不知何據劉昫唐書本紀云貞觀十九年春二月贈殷比干為太師諡曰忠烈命所司封墓葺祠堂春秋祠以少牢上自為文以祭之卽此純陀書有辨法師碑及砥柱銘歐陽修稱其書有筆法其遒勁精悍不減吾家蘭臺趙明誠始得此碑云歐陽公所未嘗見也

思順坊造彌勒像記 貞觀二十一年四月立正書篆額在洛陽伊闕

碑分四格上層篆額次層正書額中層銘文下層造象人姓名唐初字體猶有六朝遺意然別字最多至虞褚柳顏始大變其格字亦審正以此知同文之徵盛世之事也故許君序說文云諸侯力政不統於王言語異聲文字異形文字之傳可以觀世變矣此碑寫跡為斲者為者鑿為鑿備為備微為微果為菓疑為凝豎為竪豁為豁彼徒俱从人儀从才劫从刃叢作叢皆別字玉篇有攸字云邪也蓋以為頗字今此以為彼岸字則卽彼無疑云白豪月照豪不从毛是正字云松柱檟叢按爾雅灌木叢木詩集于灌木傳灌木叢木也孔穎達引李巡曰木族生曰灌陸德明爾雅正義作檟云字又作灌此云檟叢以証陸氏之有本然實灌字之誤古無檟也

洛陽父老等卅人造象記 永徽元年立淳于敬一撰正書在洛陽

碑文寫斲為斲檀為檀儀為儀庶為庶皆別字云菴菴法津可証菴菴卽從容譌字本草經有肉菴菴吳普曰一名肉松容漢人芙蓉字多作夫容是菴菴非古字明矣碑碣之文可知字體之變往往如此

招提寺三藏聖教序并記 顯慶二年十二月立王行滿正書在偃師學宮

寶刻類編有此碑玉海引兩京記云元裝與惠明靈潤等翻定六百五十七部太宗制三藏

聖教字按聖教序凡有四本一永徽四年一龍朔三年皆褚遂良書一咸亨三年懷仁集王羲之書俱在關中行滿書尚有韓仲良碑在陝西富平縣而書名不顯寶泉述書賦亦無其人觀其用筆端方繇密綽有姿致不在遂良之下蓋當時御製自皆擇善書人寫刊偶不顯于史耳末云刻字臣沈道元昔受禪碑劉禹錫以為鍾繇鑄字古人刻碑亦必用能書人鑄石乃有神采後世則命工為之不能精好也碑在招提寺不知何人移至學宮招提寺者太平寰宇記云緱氏縣古滑城在縣東一十八里城在縣東一十八都城東有角有招提寺今偃師兼有漢緱氏地也

紀功碑 顯慶四年八月立高宗御製并行書飛白額在汜水等慈寺

高宗過鄭州見先皇擒寶建德故地故緬想功業因立此碑也碑文甚宏麗字亦奇偉寶刻類編云顯慶四年八月立今據書之中有云放其累觀之辜宥其挺埴之命埴字最古說文長也類篇引方言楚部謂取物而匿曰埴今本作埴取也楚部或謂之埴一曰揉也按埴埴即揉土之義今本老子作埴亦後人傳寫之誤徐鉉新附增埴類篇又有埴字云和土也蓋謬

金剛經 正書在洛陽

碑字甚工中有而字疑武后時刻然寶刻類編有金剛經云徐浩書在洛當即此也以浩他

碑証之字體亦自相似黃叔瓚中州金石攷云龍朔三年不知何據

蘇寶才造象記 麟德元年六月立正書在洛陽白馬寺

文云弟子蘇寶才并妻劉奉為皇帝皇后造石觀世音菩薩一區今得成就謹共決俾蒼生普同供養麟德元年六月造此石自錢別駕坵搜得之

會善寺造像記 麟德元年十月立郭智及正書在登封會善寺

顧炎武金石記缺書人名諦視之實為郭智及書碑字漫滅不可讀正書猶帶隸意若金字兩字山字之類是也

金剛經 咸亨三年口月立王知敬正書在登封少林寺

金石錄作咸亨四年云無姓名蓋未諦視之耳寶泉述書賦注王知敬太原人門傳孝義工正行書劉昫唐書王友貞傳云父知敬則天時麟臺少監以工書知名

大德寺碑 上元元年秋立正書在澠池

碑云大德寺者荆河之口口也又云荆元魏帝規矩牟尼云云即為大德寺也是此寺魏時所起荆元者荆即初字元訓始也未云上口是奉歲次甲戌口秋也④滿⑤是⑥奉詔而下諸州口士女口觀口口寺先被廢今儀豫堂闕現存並還舊云云下缺是唐高宗

時復修此寺因立碑紀事也上字下缺據云歲次甲戌是上元元年其缺者知是元字此特以犬為戌代字也碑文甚奇古而字多別體如之作史龜作龜禎作禎廡作廡綵作彙之屬不及備舉通鑑稱天授元年鳳閣侍郎河東宗秦客改造天地等十二字以獻丁亥行之此碑作于上元已用而堊等字不知何也中州金石攷云唐鴻慶寺一碑未詳何代即此碑童鉦河南府志云疑即金石錄所謂澠池縣令宗人為高宗造像碑也按金石錄云神龍元年五月邵昺撰正書無姓名與此年月不合童鉦說未是

孝敬皇帝獻德紀 上元二年八月立高宗御製并行書飛白額在偃師

劉昫唐書列傳云孝敬皇帝太子宏高宗第五子也上元二年太子從幸合璧宮尋薨諡為孝敬皇帝其年葬於緱氏縣景山之恭陵制度一準天子之禮高宗親為制獻德紀并自書之於石樹於陵側即此碑也太平寰宇記云緱氏縣有恭陵孝敬皇帝陵在縣東北五里今俗亦呼太子陵河南通志誤曰敬宗陵蓋謬甚矣武進士億云碑云宏字宣慈今史于燕王忠太子賢並書字而此獨見遺蓋失紀也又云年才一歲立為代王高宗紀永徽六年封子宏為代王本傳亦同若以一歲始封數之自永徽六年至上元二年太子宏之薨年乃二十一而傳作二十四歲者誤也武君偃師人深于經史之學著有虛谷金石

錄

武后少林寺詩 永淳二年九月立王知敬正書在登封少林寺

寶刻類編有此碑此武后幸少林寺觀先妃營建之所即事悲懷詩也唐初詩尚有齊梁風韻金石略作王知恭蓋五代人避晉祖諱宋人引其文多未更正非二人也

濟源縣宗姓為高宗造太上老君石像碑 垂拱元年十二月立李審幾撰沮渠智烈正書在

濟源奉仙觀

鄭樵通志金石略有沮渠智烈書奉仙觀老君像碑云未詳即此是也碑云宗姓前河陽令李儒意雲騎尉李公協騎都尉李德爽等二百五十人奉為高宗天皇大帝於奉仙觀敬造老君石像一座并夾侍二真人蓋因高宗升遐而為祈冥福也澠池縣亦有高宗造像碑見金石錄今訪之不得此碑字體精整甚可寶玩智烈復有少姨廟碑當在偃師啟母碑見金石略當在登封亦訪之不得也

王元宗臨終口授銘 垂拱二年四月立弟紹宗正書在登封老君洞南

王元宗新唐書有傳云琅邪人紹宗兄隱嵩山號太和先生傳黃老術述書賦稱王祕監則首末全貞尊道重德或終紙而結字或重模而足墨濩落風規雄壯氣力播清譽而祖述屢

見賞於有德如曲圃鴻飛芳園桂植注云王紹宗瑯琊人修禮子官至祕書少監劉昫唐書稱紹宗尤工草隸今其書實端雅可玩

木峒魏夫人祠碑 垂拱四年正月立路敬淳撰僧從謙行書篆額在懷慶府城西北紫金壇下祠中

碑文云魏夫人者即是晉劇陽侯任城魏陽元之女也按陽元名舒晉書有傳云封劇陽子今云侯蓋誤又云本傳曰夫人年幾二十四適南劉幼彥幼彥為修武令善為德政仁風惠著時夫人隨在修武之館雖魏同舍縣內常齋于別寢季冬之月夜半聞空中有鐘鼓笳簫之聲羽旗光耀降魏夫人之靜室輦輦被服非人所聞見有四真人告夫人曰大帝勅我教子以神真之道注子於玉札應為紫虛元君上真司命名山之號封南岳夫人後為洛陽山成真人因為立祠土俗號阿夫神原按太平御覽引南岳魏夫人內傳云夫人姓魏諱華存字賢安任城人晉司徒文康公魏舒女也少讀老莊春秋三傳五經百子事常別居一園獨立閑處服餌胡麻父母偪之強適太保公掾南陽劉幼彥疇昔之志存而不虧後幼彥為脩武令隨之縣舍閑齋別寢入室百日所期仙靈季冬月夜半四真人來降于室太極真人安度明東華青童君碧海景林真清虛真人王子登於是夫人拜乞長生度世青童君曰此清

虛真人者爾之師也當受業焉景林真曰爾應為紫虛元君上真司命封南岳夫人也云云又云陽洛山有洞臺是清虛之別宮也此碑云適南劉幼彥當是南陽脫文洛陽山當為陽洛山疑皆書文人之誤碑因懷州刺史南陽鄧府君祈雨之驗因為立銘而作篆額字亦多別體如澗从山魏省山曰作山碑从山及夫字篆題字無不謬者凡九字惟兩字不誤耳魏夫人祠題名碑宋人題名附

下方有云今有魏夫人下志等處小熊青龍谷虎頭沐澗皆是聖賢以大石所試元君之處大唐四年六月五日凡三十九字所謂元君者即紫虛元君夫人是也大唐下有年月無年號或是武德初題或是後人戲書之上方及左右又有宋皇祐庚寅張吉甫至和元年張子諒何嶠姚師魯嘉祐丁酉潘旦杜璞元祐辛未脩武令張斐題名未有至元十九年三月所記廟地四至及知廟王志希名

封祀壇碑 登封元年十二月立武三思撰薛曜正書在登封縣西萬年岡

金石錄有登封元年封祀壇碑云武三思撰薛曜正書寶刻類編云萬歲登封元年十二月顧炎武云下截剝蝕亡其年月今據寶刻類編知之碑中有爾字在字即君字人字宣和畫譜載武后增減前人筆畫為十九字有此文但微誤耳鄭樵通志六書略作十八字乃遺此

二字新唐書后妃傳又作十二字俱不同亦見順陵殘碑至亦見司稼寺卿杜夫至墓志
馮善廓造浮圖石象銘 萬歲通天二年四月立趙顛撰正書在長葛

其文甚工字亦有姿致惟寫美為差纏為練丙寅為景演不朽為不朽皆異文此碑新出故
金石家多未著錄也碑中有龕刻石象字在四圍

中嶽體元先生太中大夫潘師正碣文 聖歷二年二月立王適撰司馬承禎隸書在登封老
君洞

題云弟子中巖道士猗馬肅篆書寶刻類編有此碑云司馬子缺蓋不識微字也顧炎武又
疑子微為承禎字劉昫唐書隱逸傳略云潘師正大業中度為道士師事王遠知居於嵩山
之道遙谷高宗與天后甚尊敬之尋勅所司於師正所居造崇唐觀嶺山別起精思觀以處
之以永淳元年卒贈太中大夫賜諡曰體元先生多與碑合隱逸傳又云道士司馬承禎字
子微頗善篆隸書元宗令以三體寫老子經續仙傳云承禎攻篆迴為一體號金剪刀書按
猗字見說文云司空也復說獄司空此以為司假音字耳其以肅為子微字謬甚肅乃總
字之誤說文繼籀文子凶有髮臂脛在几上也今寫从黃便失其義篆出郭忠恕汗簡云篆
微字出碧落文但說文無篆字又未知何字之譌唐時所謂工篆籀文類如此六書之學幾

絕矣

昇仙太子碑 聖歷二年六月立武后撰并草書在偃師縣南三十五里府店

劉昫唐書本紀云聖歷二年二月戊子幸嵩山過王子晉廟丙申幸緱山碑云千乘萬騎鉤
陳指靈岳之前谷遂川淳羽駕陟仙壇之所又云乃為子晉重立廟焉又改號為昇仙太子
之廟即其事也通鑑云聖歷二年二月己丑太后幸嵩山過緱氏謁升仙太子廟據碑則子
晉廟以六月改名史家不合二月即稱之宣和書譜稱后初得晉王導十世孫方慶家藏書
蹟摹榻把玩自此筆力益進其行書有丈夫氣今觀其草法極工有烏絲方格尚似章草及
皇象書孫過庭書譜智永千文之體惟世傳懷素張旭草書乃多變格後世草書之學幾絕
類皆託仿懷素甚矣人之好異也予嘗論學書之法臨帖不如臨碑碑則古人親自書丹當
時摹刊求其神采宜得十分之九其見于法帖則傳之百數十年紙墨漫滅或是後人臨摹
贗本賞鑒家誤以為真俱未可定觀大觀淳化絳汝諸帖所收名臣書譌錯支離類皆以私
意定之不足信也水經注云休水又東屆零星隴水流潛通重源又發側緱氏原開山圖謂
之緱氏山也亦云仙者升焉言王子晉控鶴斯阜靈王望而不得近舉手謝而去其家得遺
屣俗亦謂之為撫艾堆堆上有子晉祠又按史記索隱顧氏案裴秀冀川記云緱氏仙人廟

者昔有王喬健為武陽人為柏人合於此得仙非王子喬也則在水經注之前未知何據神仙之說多近于無稽周書王子晉解師曠謂王子火色不壽未及三年告死者至緱氏周邑或子晉死所耳後人哀之謬云仙也

游仙篇詩刻 武后御製薛曜正書

此即昇仙太子碑額之陰下為鍾紹京書諸臣題名詩五言排律

昇仙太子碑陰諸臣名 鍾紹京正書

碑面久為世傳摹而碑陰為諸臣題名知者絕少今錄其文第一層列春官尚書檢校內史監修國史上柱國梁王忠三思光祿大夫行內史上柱國邢國公忠王及善中大夫守鳳閣侍郎同鳳閣鸞臺平章事上柱國忠蘇味道朝散大夫守鳳閣侍郎同鳳閣鸞臺平章事忠魏元忠銀青光祿大夫守納言上柱國汝陽縣開國男忠狄仁傑銀青光祿大夫守納言上柱國譙縣開國子忠婁師德銀青光祿大夫行鸞臺侍郎同鳳閣鸞臺平章事上柱國鄭縣開國子忠楊再思朝請大夫守而官侍郎同鳳閣鸞臺平章事左控鶴內供奉忠吉頊後有勅檢校勒碑使守鳳閣舍至右控鶴監內供奉騎都尉忠口口又有題御製及口宸口梁王三思已下名忠薛稷書採石官口口口行洛州來庭縣尉忠口峻題諸口等名左春坊錄事

直鳳閣忠鍾紹京書下層大唐神龍貳年歲次景午水捌月壬申金朔貳拾漆日戊戌木開府儀同參司左千牛衛大將軍上柱國安國相王旦奉制刊碑刻石為記後列從官特進行尚書左僕射兼檢校安國相王府長史平章軍國重事上柱國芮國公豆盧欽望從官太中大夫行安國相王府司馬護軍皇甫忠朝散大夫守安國相王府諮議上柱國邢國公口溫朝議大夫行安國相王府記室參軍事業悅朝議郎行安國相王府文學韋利器朝議大夫行安國相王府倉曹參軍辛道瑜京兆韋庇行安國相王府屬韋慎口行安國相王府掾業知幾行安國相王府典軍業琬行安國相王府典軍衛日新從安國相王品官行內侍省奚官局令引參目安國相王品官行內侍省掖庭局令戴思恭後又列承議郎行左春坊錄事直鳳閣忠鍾紹京奉勅勒御書宣義郎直司禮寺忠李元琰勒御書忠卓勒麟臺楷書令史忠口伯卿勒字下列直營繕監直司韓神感刻御字洛州永昌縣忠朱羅門刻御字又有宋人題字云政和二年二月廿九日西京留守鄧洵武率僚屬恭謁王子喬祠男雍侍行武億云案此碑題名諸人多見史傳今以攷之新唐書亦時有漏誤狄仁傑封汝陽縣開國男而傳僅云睿宗又封梁國公舍前封爵不書此又字何因耶楊再思傳封鄭縣侯今碑陰乃作鄭縣開國子然則傳云侯者誤也吉頊在宰相表久

視二年三月甲戌項始加左控鶴內供奉而項侍武后從幸當聖歷二年碑陰已書此攷相王旦刊碑刻石蓋于神龍二年故得續錄其官也豆盧欽望傳帝復位擢尚書左僕射中宗紀復位當神龍元年下書特進豆盧欽望為尚書右僕射宰相表神龍元年欽望自特進為右僕射紀表與傳書左者皆不符得碑陰證之竟作左僕射此又紀與傳為獨得其實又碑云行內侍省掖庭局令據百官志惟有宮闈局令二人無作掖庭之表皆誤而文此亦自志有疏脫處也按曾子固跋襄州徧覺寺碑云鍾紹京書其字畫妍媚道勁有法誠少與為比今所見特此碑尚完以予証之此碑題名亦紹京書而幸完無缺曾氏殆未之見也鴻慶寺碑 聖歷〇年立〇〇干撰官若驚正書在澠池

碑云高祖諱龍成周蓋屋縣尉通洛縣丞隨崇政縣令曾祖諱昌仁周三嶺鎮將祖諱則下多摩滅又云爰於〇〇式建豐碑粵若稽古〇冊金輪聖神皇帝陛下云云是作碑人為其先代造寺祈福之辭若驚字甚工而無書名金石家亦多未載此碑不知何也蓋字當作蓋而漢書頗有作蓋者竟出此碑蓋唐人傳寫漢書之誤

御製夏日游石淙詩并序 久視元年五月立諸臣撰薛曜正書在登封石淙北崖

寶刻類編有此碑劉昫唐書本紀云聖歷二年四月幸三陽宮五月改元為久視通鑑云

久視元年正月戊寅作三陽宮於告成之石淙夏四月幸三陽宮蓋以此時賦詩也三陽宮在嵩山其碑三格橫書上層書詩序及天后御製七言詩一首中下層書侍游應制皇太子顯太子左奉裕率兼檢校安北大都護相王旦太子賓客上柱國梁王三思內史狄仁傑奉宸令張易之麟臺監中山縣開國男張昌宗鸞臺侍郎李嶠鳳閣侍郎蘇味道夏官侍郎姚元崇給事中間朝隱鳳閣舍人崔融奉宸大夫汾陰縣開國男薛曜守給事中徐彥伯右玉鈴衛郎將左奉宸內供奉揚敬述司封員外于季子通事舍人沈佺期各一首顧炎武譏其文內天台謠右銜謠衝瀑水謠曝今諦視之實作天台右撇一筆乃裂文耳諸臣銜名字畫淺小易于摩滅故具錄之未有大定癸卯棲雲挈家再游十字隸書是金人題名詩中有爾字即初字也鄭樵金石略作爾傳寫誤

秋日宴石淙序 張易之撰正書在登封石淙南崖

劉昫唐書本紀云大足元年夏五月幸三陽宮蓋以此時為序通鑑大足四年毀三陽宮以其材作興秦宮於萬安山自此以後武后不至石淙矣方志云是文刻石淙南崖下臨溪谿人跡罕至傅太常梅命工打本其文載嵩高金石志葉封嵩陽石刻記云今校之補識陽城二字而漫漶者十之三矣又云書與天后游石淙詩序相似疑薛曜書也未有宋至和二年

范純仁題名及熙寧宣和時題字人名

大雲寺皇帝聖祚碑 大足元年正月立賈膺福撰并隸書篆額在河內

金石錄有此碑今賈膺福名摩滅膺福與薛昌容李振鍾紹京等有工書名劉昫唐書列傳云曹州宛句人懷州刺史敦實子先天中歷左散騎常侍宏文館學士碑云河內大雲寺者本隨文皇帝所置長壽寺也河南通志不載此寺蓋其漏略碑額云大雲寺皇帝聖祚之碑篆額工聖作璧用武后字第一行書撰人名下又題睿祖康皇帝孫文林郎太原武盡禮勒上黃叔瓚中州金石考云碑陰長安二年蕭懷素書按寶刻類編蕭懷素有周大雲寺詩是也

紀信墓碑 長安二年七月立盧藏用撰并隸書篆額在滎陽

寶刻類編有此碑唐文粹載此文地形志云滎陽有紀信冢劉昫唐書本紀云麟德二年十一月次于原武以少牢祭漢將紀信墓贈驃騎大將軍知唐時甚重紀信碑未述其事惟記縣令孔祖舜表墓之美中有云石乞就亨以徇白說文無殉字知經史殉字皆當作徇又云攝齋而請齋見說文知唐人猶能用古字也今本唐文粹俱改為殉為齋賴碑刻以証之矣呂總續書評八分書五人稱盧藏用書露潤花妍煙凝修竹今觀其書信然

碑陰

陰記耕者于紀公墓側得一古石其螭首及兩側龍距文詢之故老莫究年代遂樹之于墓刊勒斯碑云云今碑額螭文宛然即其石也事甚奇異後人庶保護之

衛州共城縣百門陂碑并陰側 長安四年立辛怡諫文張元琮記孫去煩行書篆額在輝縣百門陂者左傳僖十四年晉人又敗鄭師及范氏之師于百泉是也水經注云重門城有安陽陂次東又得卓水陂次東有百門陂陂方五百步在共縣故城西太平寰宇記云共城縣百門陂在縣西北五里方五百步許百姓引之以灌稻田此米明白香潔異于他稻魏齊以來嘗以薦御陂南通漳水即其地也此碑引水經出自汲郡共山下泉流百通故謂百門會同于淇合流于海今本又無此語碑陰載祈雨晴有驗及諸人咏事詩句篆額曰百門陂碑滎陽令盧正道清德文 神龍三年五月立劉穆之撰王守哲隸書在滎陽

碑文甚縣麗可頌云身有成績以代厥字頌云琴鳴密賤以代宓字主簿字作薄漢碑皆如此可証孟子先簿正祭器之即薄也正道官至鄂州刺史葬在洛陽許家營開元間李邕為書神道碑今存史不載在良吏傳何也劉穆之見寶刻類編有長安三年劉惲造七寶阿彌陀像記是其書撰云在京兆今未見

盧正道勅 景龍元年十月立正書在滎陽

宰相世系表正道鄂州刺史今洛陽許家營有鄂州刺史盧府君神道碑云除洛州新安宰以犯諱更滎陽又云璽書是降又云免勛終始無替嘉聲卽謂此勅也正道生有美政至今葬處猶賴碑碣可以考知其祖父兄弟名具見世系表

孝子郭思訓墓志 景雲二年十二月立正書在洛陽史家灣王宅

碑云弟雍州武功縣尉思謨思謨亦有墓志兄弟俱應孝弟廉讓舉可想見其家風之美云遷合于洛陽北部鄉之原陪葬先塋之王地予覽書傳洛陽陵墓之盛甲于他縣今方志漏略不能博考故于墓碣表出之使後世不至迷失况二郭孝行尤有可嘉碑云父敬同徙居洛陽今爲洛陽人方志人物亦復不載何與後有撰志者幸按斯碑補其缺也

內侍高力士等造象功德碑 開元口口年立明皇御製并正書在洛陽

碑云弟子大監門衛將軍知口口事口口國渤海郡開國公內供奉高力士下缺又云光祿大夫行內侍省內侍上口口農郡開國公內供奉楊思勳下缺餘列諸內侍名多摩滅唐世寵昵內侍拜官進秩至人君爲書佞佛碑文未免太過其流乃有李輔國弄權之事履霜堅冰豈非千古龜鑑邪

周公祠碑 開元二年十二月立賈大義撰正書在偃師

洛陽伽藍記云首陽山舊有周公廟世隆欲以太原王功此周公故立此廟廟成爲火所災有一柱焚之不盡後三日雷雨震電霹靂爲數段柱下石及廟瓦皆碎於山下文水經注云河水南對首陽山又有周公廟今碑云偃師縣祠堂者按圖經云後人懷口恩所置也負陽岑之巖險面通谷之繁紆碑故在石橋保近首陽山當是魏時舊廟唐人所修今移碑至學宮恐失其址矣碑又云公字朝明不見經傳其下述祈雨之人爲尹李傑行少尹劉植行少尹崔元佐官司錄柳齊行令劉體微行丞王鈿行主簿李循古行尉崔延祚按李傑劉昫唐書有傳云開元初爲河南尹傑旣精於聽理每有訴列雖衢路當食無廢處斷由是官無留事人吏愛之新唐書家太子詹事景公傳云李傑爲河南尹與公皆一時選世謂畢李卽其人也宰相世系表劉氏有體微諫議大夫衛尉卿今云朝請大夫行令博陽縣開國男者是時行偃師令也通志金石略有周公祠碑云開元二年立在西京卽此而不著撰人名

嵩州都督姚懿碑 開元三年十月立胡皓撰徐嶠之正書篆額在陝州張茅南二里許墓前

寶刻類編有此碑碑載懿歷官尤詳云隋授本縣令太宗東伐王充授鷹揚郎將長沙縣男水陸道總管俄而貶授晉州高陽府折衝都尉除常州長史尋除峽州刺史累加銀青光祿

大夫龍朔初卽蠻作梗乃除使持節嵩州都督卒藁葬於硤石縣安陽公之原景龍年以時
宰先人特制追贈幽州都督又制贈吏部尚書諡曰文獻公懿乃崇之父也宰相世系表稱
硤郡姚氏梁有征東將軍吳興郡公宣業生安仁隋汾州刺史生祥隋懷州刺史檢校函谷
都尉皆與碑合惟碑云安仁青汾二州刺史祥懷州長史是世系表誤長史爲刺史足証傳
寫之失碑云懿字善意與世系表同劉昫唐書姚崇傳云父善懿貞觀中任嵩州都督則合
名字並稱誤矣嶠書之存者惟姚氏二碑此尤完整可觀良足貴也

光祿少卿姚彝神道碑 開元五年四月立崔沔撰徐嶠之正書在洛陽許家營

寶刻類編有此碑云崔沔撰今碑缺沔字劉昫唐書姚崇傳云長子彝開元初光祿少卿宰
相世系表彝鄧海二州刺史碑云拜鄧州刺史金石略有徐嶠之書光祿少卿姚彝碑注云
西京碑雖缺名知卽是也彝卽懿之孫祖孫墓碑皆嶠之所書墨池編稱唐之工書者多求
其二葉嗣名者惟徐氏新唐書徐浩傳稱浩父嶠之善書以法授浩今其書疏秀方整有初
唐虞褚遺意懿碑云葬於硤石此云葬於東都萬安山之南原孫不附祖未知何故其墓則
猶可蹤跡也

幽棲寺尼正覺浮圖銘 開元六年七月立正書在汜水多寶院

文不甚工字帶隸體云入仏法海者卽佛字關中有鄭州刺史爲子禱疾疏亦作此警四生
而雷法鼓雷字之省文也銘云皎見顧高葺此臺塔妍巖疑語疑源擬業皆以雙聲成文
常熟縣令孝子郭思謨墓志 開元九年十一月立孫翌撰正書在洛陽城內董金甌宅

碑記思謨事母孝感異蹟及武后旌表之事云耐葬洛陽東門平川碑中肉字作共茂作茂
皆異文穴字見吳越春秋又見漢史晨後碑薨字見漢書表又以上黨郡作上儻因知儻卽
黨字之俗故漢書儻只作儻也孫翌字季良偃師人所撰又有高福墓志在長安題云
麗正殿修撰孫翌季良會要稱其以校書郎爲集賢院直學士

奉先寺大盧舍那像龕記 開元十年十二月殷仲容撰正書在洛陽

盧舍那者釋元應大方廣佛華嚴經音義云或云噓祐那亦言盧折羅此譯云照謂徧照也
以報佛淨色徧周法界故也又日月燈光徧周一切處亦名盧舍那其義是也記文左行按
左行之體仿于瘞鶴銘當由厓上書丹手勢便利耳此亦用之疑當時牒文之體後卽牒也
殷仲容者曾摹孔子十字篆書之人准字作准後人以爲避寇萊公諱至今用之據此碑已
然按元重刻漢桐柏淮源廟碑云准則大聖五經文字云字林作准元應賢劫經音義准平
注說文作準同則明准字自古有之俗云避寇准諱顧炎武又以爲宋順帝名準故沈約宋

書平準令王準之皆作准蓋未然矣

相州門徒一百人等洪谷寺東建塔記 開元十四年十月立正書在林縣

按碑知塔以萬歲登封元年建有云渴仰遺形願分灰骨蓋門徒等以其師骨造塔西域立塔或以柱代之名爲剎柱以安佛骨今之立塔是其遺制近世多以形家言立塔寺中非爲葬僧蓋失其義矣又云馴爲降質諍賢吞聲按爾雅釋獸云賢有力說文云賢分別也从虬對爭貝讀若追郭璞云出西大秦國有養者似狗多力獷惡今倒寫一虎字不知何義唐人字體紕繆如此往往有之

銀青光祿大夫陳憲墓誌 開元十四年十一月立隸書在偃師

碑缺一角故撰書人不可考云公諱憲字令將平陽臨汝人又云洎七葉有漢大將軍棘蒲侯武者按漢書文帝紀云三年以棘蒲侯柴武爲大將軍臣瓚曰漢帝年紀爲陳武此云柴武爲有二姓功臣表作陳武然則憲姓陳又云葬于偃師縣龍池鄉之北原耐先塋今鄉名旣失墓亦不載于方志又云又嘗著中道通教二論注周易撰三傳通誌廿卷集內經藥類四卷合新舊本草十卷並行於代唐志旣皆未著錄而大觀本草稱引最博亦無藥類書之難成而易失如此

道安禪師碑 開元十五年十月立宋儋撰并行書李錡題額在登封會善寺廢戒壇前

寶刻類編有此碑云是李錡題額今摩滅述書賦注宋儋字藏諸廣平人高尚不仕戶部侍郎宇文融薦授祕書省校書郎作鍾體而側戾放縱迹不副名開元中舉場中後輩多師之葉封嵩陽石刻記云淳化閣帖誤列儋書于秦程邈後是碑于萬歷時雷震爲兩截下截入土掘地出之漫滅不可讀矣

嵩岳少林寺碑 開元十六年七月立裴淮撰并行書在登封

金龕琳瑯載其文按太平寰宇記云緱氏縣少林寺後魏孝文太和十九年立西城沙門號跋踰有道業深爲高祖所敬信制于少室山隈立少林寺以居之公給衣供食碑云沙門跋踰者天竺人也緬自西域來遊國都大和中詔有司於此寺處之淨供法衣取給公府卽其事也太平御覽引談藪云北齊高祖多殺戮有稠禪師者以業行著稱箴之曰陛下羅刹化臨水必自見之如其言果見羣羅刹在其後乃禁斷鷹鷄造佛寺斷屠殺不食肉腥止食菜果而已碑云稠禪師探求正法住持塔廟卽其人也神僧傳云達磨北趨魏境尋至維也初止嵩山少林寺終日面壁而坐九年遂逝焉葬熊耳山碑云復有達磨禪師深入惠門津梁是寄弟子惠可禪師等元悟法寶嘗託茲山亦卽其事今寺右上山三里有達磨洞洞有石

壁達摩面之九年形迹宛然石上寺殿後有立雪堂世傳達摩徒惠可欲嗣其法雪深至腰
不去事甚神異然劉昫唐書方伎傳言達摩隱於嵩山少林寺遇毒而卒正史之言信而有
徵與他書固不同矣

三尊真容像支提龕銘 開元十九年九月立蔡景撰正書在林縣洪谷

碑前有銘文後述二法師道行一名義經一名乳壽皆蛤谷寺住持按蛤非古字見玉篇胡
東切大谷名水經注隆慮縣有黃水出于神囿之山黃華谷北崖上去地七里縣水東南注
壑直瀉巖下狀若雞翹故謂之雞翹洪然則蛤乃洪字之俗書耳碑云天資妙妓說文以妓
爲婦人小物物猶事也卽謂技藝唐人尚能用古字今則但知爲妓樂之義矣支提者一切
經音義云又名脂帝浮圖此云聚相謂壘石等高以爲相或言方墳或言廟皆隨義釋也

尊勝經幢 開元十九年十一月立正書在鞏縣淨土寺

幢末題開元十九年歲次辛未十一月景午朔十五日庚申前左轡府長史王元明奉爲口
代父母洎亡妻見存兄弟合家大小六親眷屬一切衆生建立此幢咸同此福又題唐大中
八年歲次甲戌正月丙戌朔廿六日辛亥再立此幢幢主當寺上座僧太初云云又題大漢
乾祐年初歲次浚灘月建辛酉五日辛巳重立幢主穆進云云是幢屢仆屢立知爲開元時

原刻者以開元款識字樣與經文無二大中乾祐二題又異體也淨土寺卽魏石窟寺洛陽
伽藍記云京南關口有石窟寺卽此寺內有景明造象鑿厓谷爲之奇偉無比

中州金石攷右石幢筆法古勁未詳何人所書郵學究以字跡不真用礮灰填塞今郵童模寫
許州通判程志智命工剔拭仍還舊觀

慈州刺史光祿卿鄭會碑 開元二十四年五月立梁昇卿撰并隸書篆額在滎澤

碑缺書撰人名據寶刻類編知之金石略云未詳卽此是也碑云曾字參榮陽開封人也烈
祖爲隨尚書右丞聘陳使永安侯大父嗣元唐通事下考九思洪州豐城口按宰相世系表
曾慈州刺史正與此同父九思流水令曾祖爲後周行臺左丞尙是官位之異耳祖弼誠解
令則與碑大異作世系表時當有鄭氏族譜爲據何至錯誤如此不有此碑則曾之大父非
實矣据世系表則爲曾之曾祖而碑云烈祖似是遠稱疑中脫嗣元一代也云及觀號嘯
出道經云終日號而嗑不嘍然嘍字說文所無惟陸德明釋文本老子作嘍一邁反氣逆也
又於介反下又云當作噫是亦知爲無此字唐傳奕校定老子古本篇作歎注於油切氣逆
也說文又無歎字玉篇嘍於求切引老子曰終日號而不嘍嘍氣逆也据此乃知嘍卽嘍字
之誤是碑書於開元時僅据陸氏通行之本未見傳本耳傳本今存道藏中與玉篇音適合

知其說之有本矣梁昇卿見新唐書韋抗傳云淺學工書于八分尤工歷廣州都督書東封朝覲碑為時絕筆又御史臺精舍記亦其所書也全唐詩有奉和聖製荅張說扈從南出雀

風谷詩一首
臨高寺碑 開元二十五年四月立常允之撰弟演之行書在闕鄉東南二十里本寺

碑云臨高寺者西魏口書口劉謙之宅捨充寺焉處高臨下茲以建号其文甚工麗字亦姿致可觀惟寫葺為蒼海為隳騰為騰戍為戍閭為閭奐為奐煥為煥最為紕繆餘文亦多別體云輻轆連碎出漢書楊雄賦云輻轆不絕孟康曰輻轆連屬貌如淳曰音雷盧實漢人俗字也勢字作勢按此字本執之譌从力从乃亦不必執其一足矣古無喻字以譬諭為譬喻猶用古字末有一行云殿內西鋪大像主上柱國劉知音

景賢大師身塔石記 開元二十五年八月立羊俞撰僧温古行書在登封會善寺王維有留別温古上人兄詩云宗兄此削髮蓋其族也金石錄有温古行書唐傳菩薩戒頌

立尉遲迴廟碑 開元二十六年正月立閻伯璵撰序顏真卿撰銘蔡有鄰隸書在安陽

迴周書有傳碑記迴官較詳有云大統初仕魏散騎侍郎歷大丞相帳內都督尚魏金明公主封西口縣侯轉車騎將軍領侍中尚書僕射十六年拜大將軍兼益梁等十八州諸軍事

益州刺史改寧蜀郡公周之興也督隴右十二州進公開國公食邑萬戶摠秦口文康十四州軍事累遷大師馬冊大師加上柱國俄拜大右弼口口大前疑授相州摠管本傳云稍遷大丞相帳內都督累遷尚書左僕射兼領軍將軍後拜大將軍又云乃令迴督開府又云詔迴為大都督益潼等十八州諸軍事益州刺史孝閔踐祚進位柱國大將軍封寧蜀公進蜀公爵邑萬戶宣帝即位以迴為大前疑出為相州摠管與史稍異可以參考碑又云唐武德中朝制改葬口終追舊本傳云武德中迴從孫庫部員外郎者福上表請改葬朝議以迴忠于周室有詔許之即其事也下述開元丁丑歲相州刺史張公嘉祐立廟之事有口稱多崇云云字多剝蝕廣川書跋載其碑又引唐世說自迴之死而相州都督死者前後相繼張嘉祐既治事夜整冠危坐有自西廡出者曰余後周尉遲迴也死於此遺骸尚存願得畢葬前牧守者膽薄氣老驚悸而逝非所害也又指其女子曰同瘞于此明日嘉祐發掘得之備衣衾棺器禮而葬焉既夕出謝曰余無他能類畢公之政節宣水旱唯所命嘉祐以事聞上請置廟歲時血食有詔褒異事見尚書故實今按之本傳及碑迴之改葬在武德時以從孫者福表請則非嘉祐改葬明也後人特因此碑多崇之說從而附會成之亦可見唐人小說類皆造作事端非其實矣蔡有鄰者即杜甫李潮八分小篆歌所稱尚書韓擇木騎曹蔡有鄰

也廣川書跋又稱此碑當與鴻都石經相繼信不虛美金石略有蔡有鄰八分書尉遲迴廟碑并碑陰未詳又有顏真卿周太師蜀國尉遲公廟碑云在相州蓋誤以撰銘爲書碑也

碑陰

碑陰爲迴族孫士良述張嘉祐德政之美意感其立廟爲著于碑耳亦蔡有鄰書

開元寺貞和尚塔銘 開元二十六年七月立沈興宗撰隸書在汝州

碑云禪師諱貞茲郡京兆人也京兆郡名上云茲郡者其義不可詳或唐以洛爲東都亦可稱京兆歟又云俗姓張氏自輪奐規唐貂蟬蔚漢姜宋草齒袁揚前倫規唐猶云規晉姜宋蓋謂姜望宋微子袁揚蓋謂袁安揚震也又有前刺史故丞相齊公崔日用史部尚書李嵩皆頂奉山宇云云按崔日用李嵩劉昫唐書有傳貞禪師者駐錫風穴山嘗習衡陽三昧其化大行一夕溘然示寂守宰李嵩閣維之得舍利千粒明皇謚爲七祖碑隸書甚劣惟用肯爲前卽并字之省用已爲以尚有古意年號貳拾陸字用代二十六與五經文字九經字樣同餘碑少見錢塘縣丞殷府君夫人碑 開元二十六年立顏真卿撰并書在洛陽

金石略載真卿書獨遺此碑寶刻類編有顏真卿書殷履直夫人顏氏碑卽此碑四面書字多磨滅其稱殷君云皇朝秦王記室缺二府君之曾真卿稱口十三姪男蓋其姑也金石補

遺云在河南府學道居寺天王殿前新自地中掘出者按此碑已見寶刻類編則非新出號國公造象記 開元口口口年四月立徐浩行書在洛陽

文云號國公立身幹蠱英謀駿口橫行邊徼追馬援之功口口口庭盡曾參之養金石補遺以爲徐浩行書今缺其名玩其筆蹟良是也在內侍省功德碑西五步許

隴西縣君牛氏像龕碑 張九口撰隸書行書額在洛陽

金石錄有龍門西龕石象記張九齡撰八分書開元中立當卽此碑碑云口寇牛父厥後有晉將軍口牛字金下缺按宰相世系表云牛氏出自子姓宋微子之後司寇牛父子孫以王父字爲氏漢有牛邯爲護羌校尉因居隴西後徙安定再徙鶉觚安定牛氏出自漢隴主簿崇之後而獨不及晉牛金此可補史之缺云攻香龕以洞啟龕從龍省竜汗簡以龕爲龍本此也

中州金石記卷三
 賜進士及第兵部尚書兼都察院右都御史總督湖北湖南等處地方軍務兼理糧餉暫留河南巡撫畢沅撰
 唐下
 中大夫上柱國鄂州刺史盧府君神道碑 天寶元年二月立李邕撰并行書在洛陽許家營
 撰人年月缺諦視口州字亦不了寶刻類編有鄂州刺史盧府君碑云李邕撰并書天寶元
 年二月立在洛宰相世系表正道鄂州刺史碑云除洛州新安宰以犯諱更榮陽今榮陽又
 有景龍元年盧正道勅及榮陽令盧公清德文据此諸証知卽正道碑也碑云祖諱寶素隨
 晉州別駕考諱安口縣州長史考宰相世系表有盧寶素隋澤州內史部長晉州別駕子安
 壽縣州長史正與碑合下一格子正紀汝州司馬其上一格與安壽並列者正道鄂州刺史
 蓋世系表十三上二十七葉誤以正道移上一格遂致父子亂次賴有碑以考正之也世系
 表安志當是安壽弟正勤正義正言當是正紀正道兄弟佻當是仇弟推其名字相似知之
 今皆上一格後之刊此書者幸改正之二十六葉亦誤上一格惟二十九葉有正容與正紀
 正道並列不誤
 玉真公主受道靈壇祥應記 天寶二年立道士蔡瑋撰元丹邱正書在濟源靈都宮
 中州金石記卷三

中州金石記卷三

賜進士及第兵部尚書兼都察院右都御史總督湖北湖南等處地方軍務兼理糧餉暫留河南巡撫畢沅撰

唐下

中大夫上柱國鄂州刺史盧府君神道碑 天寶元年二月立李邕撰并行書在洛陽許家營

撰人年月缺諦視口州字亦不了寶刻類編有鄂州刺史盧府君碑云李邕撰并書天寶元

年二月立在洛宰相世系表正道鄂州刺史碑云除洛州新安宰以犯諱更榮陽今榮陽又

有景龍元年盧正道勅及榮陽令盧公清德文据此諸証知卽正道碑也碑云祖諱寶素隨

晉州別駕考諱安口縣州長史考宰相世系表有盧寶素隋澤州內史部長晉州別駕子安

壽縣州長史正與碑合下一格子正紀汝州司馬其上一格與安壽並列者正道鄂州刺史

蓋世系表十三上二十七葉誤以正道移上一格遂致父子亂次賴有碑以考正之也世系

表安志當是安壽弟正勤正義正言當是正紀正道兄弟佻當是仇弟推其名字相似知之

今皆上一格後之刊此書者幸改正之二十六葉亦誤上一格惟二十九葉有正容與正紀

正道並列不誤

玉真公主受道靈壇祥應記 天寶二年立道士蔡瑋撰元丹邱正書在濟源靈都宮

中州金石記卷三

中州金石記卷三

一

碑文摩滅多不可辨有云公主法号無上真字元元按新唐書列傳云玉真公主字持盈始封崇昌縣主俄進號上清元都大洞三景師與碑所稱無上元元之號不合豈公主又自加道號歟史稱公主薨寶應時而世俗傳靈都宮爲公主昇仙之處志家載之可謂大愚矣金石略又有蕭誠書玉真公主受道祥應記亦當在此今不可得也

嵩陽觀聖德感應頌 天寶三載二月立李林甫撰裴迴題額徐浩隸書在登封嵩陽宮遺趾寶刻類編有此碑記元宗命道士孫太冲設醮燒丹之事通鑑云天寶四載上謂宰相曰朕比以甲子日於宮中爲壇爲百姓祈福朕自草黃素置案上俄飛升天聞空中語云聖壽延長又朕於嵩山鍊藥成亦置壇上及夜左右欲收之又聞空中語云藥未須收此自守護遂曙乃收之太子諸王宰相皆上表賀蓋是時元宗好道甚矣新唐書地理志河南有伊水石堰天寶十載尹裴迴置迴方爲河南尹故題額也司空圖書屏記稱浩或草或隸尤爲精絕墨池編稱浩善正書八分真行今觀其隸書甚工致與正書信爲二絕也

張尊師探元遺烈碑 天寶三年六月立蔡璋撰韓贇行書在濟源

碑云先生諱探元字體微家世南陽正一真人道陵師君之胄按三國志列傳云張魯沛國豐人也祖父陵客蜀學道鶴鳴山中造作道書以惑百姓而此碑及道書昇元經等通謂陵

爲道陵未知何意元世述張道陵家世甚詳不知唐時已有正一封號矣碑又稱家世南陽亦與史言豐人不合又述玉真公主於陽臺下構館曰大洞三景法師却與新唐書玉真公主傳合又述公主罄散湯沐首事增脩探元亦以恩賜口裘器服資營繕之事云惜乎厥功未口而冥然體逝是其徒傷其卒而述其道行之文也

嵩山大德淨藏禪師身塔銘 天寶五載十月立行書在登封

碑云大師諱藏俗姓儼濟陰郡人儼字未詳當爲郝異文又云攀暮教緣奢花雨淚暮則慕之誤奢花二字未詳也又偈云無言可誇當以爲聆字玉篇誇力丁切銜也非此義廣韻誇誇音相次庶幾近之

宴濟瀆序 天寶六年十二月立達奚珣撰薛希昌隸書鄭珣撰後序在濟源

朱長文墨池編有此碑其文與字甚工金龕琳琅所未載但得其碑陰之遊記而已濟瀆在縣西三里有池周七百步其西一池周與之等而中通焉卽濟水所聚其源自王屋天壇山顛伏流百里至此復見東南合流至溫縣入河禹貢云導兗水東流爲濟北山經王屋之山灑水出焉而西北流注於泰澤地里志兗作沅水經注灑作聯此濟瀆實當名沅水至溫縣入河乃名爲濟字當作沅後人于此呼之甚乖經典矣

游濟瀆記 達奚珣撰立薛希昌隸書在宴濟瀆序碑陰

文甚似六朝字亦唐隸之至工者與都穆金籀琳瑯對校有云不以險阻斷其勢都穆不識
斲字而云闕一字今此字甚完好說文斲斷也从斤斷艸譚長說斲籀文折从艸在久中久
寒故折足証唐人猶能用古字都穆又誤以軹縣西北數十里為南北遠而見奇為貌奇四
時壹色為一色徹岸猶冷為危岸庶託豪翰為庶記賴有原刻証之

少林寺靈運禪師功德塔碑 天寶九年四月立崔琪撰僧勤口行書在登封

文云上人諱靈運蕭姓蘭陵人按蘭陵東海縣此當稱南蘭陵則省文古人有之金石文字
記云碑頂有字云寺西石塔靈運禪師墳即梁帝皇嗣者也黃叔瓚中州金石考云陰陀羅
尼經咒高岑書按岑唐嵩山隱士

永泰寺石幢 天寶九載八月立正書在登封本寺殿中

未有施主清河張趙并妻彭城劉氏云云下多漫滅

某尊師碑 天寶十年二月立口口撰翟灝行書在濟源靈都觀

碑多摩滅乃其徒因尊師既卒頌揚道行之詞獨缺其姓名有云祖皇隨任洛州司戶參軍
祖楚皇任戶州上庸縣丞亦不能考其人也中述玉真公主於仙人臺下建立山居之事蓋

亦與尊師並時入道也未云以七月七日遷於尚書谷之東阜是其葬處碑側有字數行末
題太和五年辛亥二月三日壬申山人胡遊記

永泰寺碑頌 天寶十一載閏三月立釋靖彰撰荀望正書在登封永泰寺

朱長文墨池編有此碑碑略云寺創自後魏正光一載孝文帝之妹入道為尼及神龍二載
僧道瑩奏為永泰公主於前件故伽藍置寺一所請以永泰為名觀荀望書結體茂密不減
蘇靈芝而無書名何也

少林寺還天王師子記 天寶十四載八月立正書在登封少林寺

碑載久視元年僧義獎等狀及武后口勅顧炎武始見之

會善寺戒壇勅牒 大歷二年十一月立正書在登封

朱長文墨池編有此碑碑分二格上層載元載杜鴻漸王縉等奏準牒文下層載釋乘如
上表劉昫唐書王縉傳云縉與杜鴻漸捨財造寺無限極初代宗喜祠祀未甚重佛而元
載杜鴻漸與縉喜飯僧徒代宗嘗問以福業報應事載等因而啟奏代宗由是奉之過當
深述其弊又云故大歷刑政日以凌遲有由然也又云其傷教之源始于縉也今此奏牒
正是作俑之証劉昫良吏防微杜漸之言豈不信而有徵哉

張禪師義琬墓志 大歷三年二月立正書在洛陽乾元寺東壁

碑述中書令汾陽郡王郭公表義琬禪行素高勅賜謚號大演禪師郟字作昧以艸體為楷書也

大證禪師碑銘 大歷四年三月立王縉撰徐浩正書在登封嵩嶽寺後

禪師號曇真姓邊陳留開封人大歷二年賜號大證禪師文苑英華載此碑其文尚可攷年月据寶刻類編今摩滅也述書賦注稱縉為文筆泉藪是時縉捨財造寺之弊甚矣唐代宗尊重二氏至沙門道士死而賜官賜謚誠可嗤笑碑列縉銜云太清太微宮使崇元宏文館大學士上柱國齊國公劉昫書止云太微宮使其崇元作崇賢無齊國公封號皆當以碑為正

裴遵慶神道碑 大歷十一年二月立楊綰撰盧曉隸書并篆額在洛陽

寶刻類編有右僕射裴遵慶碑云楊綰撰盧曉隸書大歷十一年二月立在洛今碑缺年月及書撰人名知卽是也碑記遵慶歷官詳于本傳云以門蔭授興寧陵丞兼遷大理丞外口轉司勳吏部郎丁內艱去職免喪以太守外口至德初口口賊庭將趨行在故太尉清賀於朝遽拜給事中累遷尚書右丞兵部戶部口校吏部口郎黃門侍郎平章事就加金

紫光祿食一百戶口口太子少傅口口吏部尚書遷右僕射并領口口云云皆與史不甚異遵慶有二子向會宰相世系表云向吏部尚書會都官郎中

容州都督元結表墓碑 大歷口年十月立顏真卿撰并正書在魯山學官

其文與新唐書本傳略同宋祁當卽据此為之惟碑云祖利貞史云祖亨字利貞碑云充山南東道節度參謀史作西道碑云猗玗洞史作猗玗沮碑云將家漢濱史作讓濱蓋傳寫之誤李義山作元結文集後序云見憎於第五琦元載故其將兵不得受作官不至達母老不得盡其養母喪不得終其哀碑獨不述其事者以同時忌諱而新唐書則應採錄此事乃僅襲碑文何也碑云葬君子魯山青嶺泉波原今在縣城北三十里青嶺俗名青條嶺也金石錄云按唐書列傳結後魏常山王道十五世孫而碑與元氏家錄序云十二世蓋史之誤又碑與元和姓纂皆云結高祖名善禱而家錄作善諦未知孰是

碑文云 缺 唐故容州都督兼御史中丞本管經略使元君表墓碑銘并序金紫光祿大夫行湖州刺史上柱國魯郡開國公顏真卿撰并書嗚呼可惜哉元君君諱結字次山皇家忠烈義激文武之直清臣也蓋後魏昭成皇帝孫日常山王遵之十二代孫自遵七葉王公相繼著在傳史高祖善禱皇朝尚書都官郎中常山郡公會祖仁基朝散大夫哀信令

襲常山公祖利貞霍王府參軍隨鎮改襄州父延祖清靜恬儉歷魏成主簿延唐丞思閑
輒自引去以魯縣商餘山多靈藥遂家焉及終門人諡曰太先生寶應元年追贈左贊善
大夫君聰悟宏達倜儻而不羈十七缺書乃受學于宗兄先生德秀嘗著說楚賦三篇中
行子蘇源明駭之曰子居今而缺真淳之語難哉然世自澆浮何傷元子天寶十二載舉
進士作文編禮部侍郎陽浚曰缺第汙元子耳有司得元子是賴遂登高科及羯古首亂
逃難于猗玕洞因招集鄰里缺餘家奔襄陽元宗異而徵之值君移居讓溪乃寢軋元二
季李光弼拒史思缺陽肅宗欲幸河東聞君有謀略虛懷召問君悉陳兵勢獻時議三篇
缺大悅缺卿果破朕憂遂停乃拜君右金吾兵曹攝監察御史充山南東道節度參謀缺
仍於唐鄧缺蔡等州招緝義軍山棚高冕等率五千餘人一時歸附大墜賊境於是缺侵
前是泌南戰士積骨者君悉收瘞刻石立表命之曰哀業將吏缺剛挫銳不敢缺降威望
日崇時張瑾殺史翹於襄州遣使請罪君為缺不勇勵缺將張遠帆缺羸等缺軍屬缺
超拜至此時論榮之屬道士缺泰芝誣湖南都被決殺推官嚴郢坐流俾君按覆君建明
承鼎無缺仲昇為賊所擒裴茂缺遠近危懼莫缺晏然今上登極缺使留後者例加封邑
缺作郎遂家于武昌之樊口著自釋以見意其略曰少習靜缺難于猗玕洞著猗玕子三

篇將家讓濱乃自稱浪士著浪說缺湯為官乎遂見呼為湯郎著湯記七篇及家樊上浪者
戲謂之聲寔以缺又以君湯浪於人間或謂湯寔歲餘上以君居貧起家為道州刺史缺賊
所陷人十無一戶纔滿千君下車行古人之政二季間歸者萬餘家賊亦懷缺敢來犯既受
代百姓詣闕請立生祠仍乞再留觀察使奏謀第一轉容府都督兼缺本管經略使仍請禮
部侍郎張謂作甘棠頌以美之容府自艱虞以來所管皆固拒缺君單車入洞親自喻撫六
旬而收復八州丁東郡太夫人憂百姓詣使請留大歷四年缺四月拜左金吾衛將軍兼御
史中丞本管使如故君矢死陳乞者再三優詔哀許缺季春正月朝京師上深禮重方加位
秩不幸遇疾中使臨問者相望夏四月庚午薨于永崇坊之旅館春秋五十朝野震悼焉二
子以方以剛能世其業名雖著而宦未立以其季冬十一月壬寅虞葬君于魯山青嶺泉陂
原禮也嗚呼君其心古其行古其言古躬缺是三者而見重於今雖擁旄麾幢摠戎於五嶺
之下弥綸秉憲對越於九天之上不為不遇然以君之才之德之美竟不得專征方面登翼
太階而感激者不能不為之太息也君雅好山水間有勝絕未嘗不枉路登覽而銘贊之感
中行見知之恩及亾至今分宅以恤其子其不缺此類中書舍人楊炎常袞皆作碑誌以抒
君之德業故吏大歷令劉袞缺江華令瞿令問故將張滿趙溫張協王進興等感念恩舊皆

送器以終葬竭資鬻石額垂美以述誠真卿不敏嘗忝次山風義之末尚存盡往敢廢無媿之辭銘曰次山斌斌王之蓋臣義烈剛勁忠和儉勤炳文華國孔武寧屯率性直方秉心真淳見危不缺臨難遺缺德今之古人奈何清賢實志莫申羣士立表垂聲不泯

大岷山銘 建中三年四月立洪經綸正書在濬縣

銘云登于大岷舍所經過頂凸坤儀根壓洪河天生忠良濟物宏多山靈河神俾環海戢戈後云唐建中元年四月廿一日勅魏博成德幽州等道黜陟使諫議大夫洪經綸題按洪經綸劉昫唐書有傳大岷山當在汜水此濬縣黎山唐人誤指爲之也攷水經注引鄭康成注尚書大伾云地喉也沈出伾際矣然則大伾在河內修武武德之界濟沈之水與滎播澤出入自此書正義引張揖云成皐縣山也水經注云河水東逕成皐大伾下伾北卽濟沈之故瀆矣成皐縣之故城在伾上滎帶伾阜絕岸峻周高四十許丈据鄭張酈三君之說則大伾當在今汜水縣西北漢成皐故城之所在也山在河南鄭從河北言之則云在修武武德之界謂修武東武德西也武德卽今武陟亦謂成皐之山是真古說而唐人多以爲在濬縣者本于臣瓚書疏引漢書音義有臣瓚者以爲修武武德無此山也成皐縣山又不一成今黎陽縣山臨河豈不是大伾乎瓚言爲然括地志元和郡縣志亦從瓚說予原瓚意誤以大伾

在河北而修武武德間無大山故以濬縣之山當之不知成皐自有大伾且山祇一成本非峻嶺水經注引爾雅許叔重吕忱等並以爲一成惟今本說文及偽孔書傳以爲再成王光祿鳴盛以爲李陽水輩改從偽孔之謬正與予意合岷字甚俗正文當爲伾尚書借伾史記借邳皆古人假音字耳此作岷从山釋文尚書音義亦云伾本作岷又云字作岷蓋唐人旣誤以濬縣大山當之乃造爲从山从阜之字可笑也予嘗過古成皐登陟坡陀縣厓周阻特無石壁乃悟古人制字命名一成爲伾字从土之義碑云舍所經過當是禹字汗簡作舍卽岷字變文也凸字出葛洪字苑廣韻云凸出兒在充字下知卽凸字之誤說文凸不順忽出也下从倒子正凸出之義充籀文凸字

大岷山銘功碑 貞元二年五月立李沛撰陳口卿行書在濬縣

碑爲平李希烈銘功之詞劉昫唐書德宗本紀云興元元年十一月癸卯宋亳節度使劉洽與曲環破希烈之衆於陳州俘斬三萬級生擒賊將翟崇暉以獻戊午劉洽大破希烈之衆擒其僞相鄭賁等五人以獻希烈遁歸蔡州汴州平碑所云大都統檢校司空同中書門下平章事懷德郡王汴宋節度劉公卽洽也碑又云二年之四月同戚口變霜刃口發身分蔡下首懸藁街又云五月有詔會大梁洪班口賞勞以還師卽指李希烈爲其牙將陳仙奇所

殺并誅其妻子仙奇以淮西歸順之事亦與史合

鴻臚少卿張敬詵墓志 貞元十年九月立薛長儒撰正書在洛陽

碑云寔於漚澗之陽邨山之新塋蓋以鴻臚少卿為河南尹裴諝命為押衙卒而葬于洛陽也

嵩山會善寺戒壇記 貞元十一年七月立陸長源撰郢隸書并篆額在登封大歷勅牒碑陰

寶刻類編及朱長文墨池編俱有此碑碑云漢晉間有高僧植貝多于西峯一年生花因為

浮圖按太平寰宇記引嵩高山記云漢有道士從外國將貝多子來於嵩岳西脚下種之并

立浮圖今有四樹與眾木有異一年花白色其香甚佳與碑云高僧不合蓋傳聞異詞也陸

長源新唐書有傳陸郢見陶宗儀書史會要稱其善書

濟瀆北海壇祭器襍物銘并陰 貞元十三年立張洗撰隸書在濟源

集古錄有此碑明都穆金齏琳琅亦載其文而遺其碑陰又遺器物名數題在碣之陰也十

字第一行北海壇二所脫二所兩字偃革口儒上闕一字以為闕二字及以沁河為池河以

俟後賢為以待皆賴有原刻証之碑陰有云沾二者即坵有云柒盒子柒杓子者柒本漆字

艸書後人又變為正字故山海經漆本或作柒也

彭王傅徐浩神道碑 貞元十五年十一月立張式撰子峴正書并篆額在偃師學宮

碑云除襄州刺史加本州防禦使賜金印紫綬及京師失守翠輦西巡成都公請行在所口

中書舍人集賢殿學士時鸞輿未復鶴詔急宣尤資倚馬之能多類奮鞭之速公虔恭法口

咫尺天顏口管風生落牋泉灑又云以本官兼尚書右丞封會稽縣開國口是浩自襄陽防

禦使遇安祿山之難遂從明皇在蜀授尚書右丞新舊唐書既遺浩趨行在之事舊書則云

安祿山反出為襄陽太守本郡防禦使賜以金紫之服誤以安祿山反在浩為防禦之前又

云肅宗悅其能加兼尚書右丞亦誤以元宗為肅宗矣碑又言當時以陷賊衣冠正名同惡

百辟會議三司定刑其徒三千將寘重典公廷諍三進竟獲減論是浩當時救陷賊官有力

與李峴議同此實不朽之事史俱不載何也浩墓在偃師故碑云葬于東都偃師縣先塋之

左今移碑至學懼其日久遂致迷失也寶刻類編云彭王傅徐浩碑張式撰次子峴正書并

篆額表姪張平叔題識貞元十五年十一月立在洛今缺峴名墨池編稱徐峴善書工行草

石曼卿得其石刻屢稱於人其書信有父風

軒轅鑄鼎原銘 貞元十七年正月立王顏撰袁滋籀書在闕鄉

碑見廣川書跋其字甚劣又寫轅為輶地為坵得為得氣為金衍為衍墳為墳升為陞秦為

秦皆別字按从車之字不當為車地从也不當从它金字不知所据管子輕重戊處戲作造六崐以迎陰陽汗簡去部有鹵云氣字出淮南王上升記俱似此金字疑有譌謬然不知其正文何若也衍从水不當从彡墳从卉不當从巾从𠂔此字音拱升俗作陞秦从雨不當从𠂔此從字所又碑云南華經曰寫曰為目則刊者之誤云失德乙仁說文乙云古文及秦刻石及如此乙非縮文而滋以為籀書觀其餘文字亦未能合籀書之載在說文者甚多滋作小篆尙多別體安能知籀乎乃劉昫唐書良吏傳稱袁滋工籀書雅有古法蓋耳食之言矣碑刻于貞元十七年滋為華州刺史兼御史中丞劉昫書稱拜尙書右丞知吏選事出為華州刺史兼御史中丞潼關防禦使鎮國軍使在貞元十九年來年夏不知何也

軒轅鑄鼎原銘碑陰 貞元十七年二月立正書

廣川書跋以為韋諷書今摩滅碑分三格上層銘并序釋文中層王顏進玉石佩表草下層錄事參軍裴口等題名其表草略云湖城縣界有鑄鼎原縣有昇仙宮寺臣令口於原上最高處刻石表之因於原上選地對穿穿深四尺得玉石口口口是一片穿時為土工所折今作四段有縣珮孔子二微臣測度恐是黃帝上昇之時微臣遺墜之物云云按史記封禪書申公曰黃帝采首山銅鑄鼎於荆山下鼎既成有龍垂胡髯下迎黃帝上騎羣臣後宮上者

七十餘人龍乃上去餘小臣不得上乃悉持龍髯龍髯拔墮黃帝之弓百姓仰望黃帝既上天乃抱其弓與胡髯號故後世因名其處曰鼎湖其弓曰烏號魏土地記云宏農湖縣有軒轅黃帝登仙處元和郡縣志云湖城縣荆山在縣南即黃帝鑄鼎之處今閬鄉即漢湖縣地故荆山在焉也

張說夫人樊氏墓志 永貞元年十月立釋至咸煥正書在洛陽

碑為沙門所撰因其長女出家寧刹寺或受戒于沙門也唐世重釋氏風俗之無禮如此後有般若波羅心經真言揭諦作羯諦釋氏之書有音無字固無不可假借為之云葬於平樂鄉朱陽原亦洛陽古鄉名以好佚為好迷異文以宦為宦俗字

朝請大夫鄭府君碑 隸書在洛陽許家營東十里許家莊

其文摩滅可辨者惟帝識尙書之履及魏郡通守口之孫數處黃叔琦中州金石攷云元和二年韓皋撰不知何据趙上舍魏云碑文一曰婉順貞和又曰淑德曰貞柔銘曰象軒雉服應是新鄭郡君鄭氏碑也趙君仁和人攷古之學近無其匹

竇叔向碑 元和三年十月立羊士諤撰易直正書在偃師

金石錄有此碑金石略有竇易直書左拾遺竇叔向碑羊士諤撰未詳即此其字摩滅棄在

牛王廟作供几近始移置學宮其文之可辨者云有唐左拾遺贈使持節舒州諸軍事舒州刺史扶風實公洎夫人汝南袁氏繼室贈臨汝太君口元和二年秋八月十七口口啟殯自丹陽郡覆金山克葬於河南之偃師按叔向墓在今縣西二十里蔡莊保韓愈撰國子司業實牟墓志銘云葬河南偃師先公尙書之兆次牟卽叔向子也碑又云西河郡公口代祖紹左武衛大將軍改封在平公高祖善衡口慶口郡下缺三字在平烈考允同昌口司馬又云口夫人有子曰常殿中侍口口內供奉賜緋魚袋湖南郡團練判口次日牟下缺又云繼室口臨汝太君有子曰羣御史中丞賜紫金魚袋次日庠殿中侍御史內供奉鎮海下缺曰鞏下缺按宰相世系表實武之後有敬遠封西河公居扶風平陵孫善衡則碑云西河郡公者卽敬遠也世系表不載紹當是敬遠之子于叔向爲四代祖也韓愈實牟墓志亦無紹可援碑以補實氏譜系之缺世系表叔向祖懷宣洪州都督夔公今碑缺此一代其子曰常曰牟曰羣曰庠曰鞏俱見劉昫唐書及世系表而官爵與表傳皆異可以參考易直穆敬時相劉昫唐書有傳碑稱第十一姪表誤上一格與叔向並列宜改正羊士諤者柳宗元楊評事集序云泰山人墨池編稱其與韓梓材同在越州亦以文翰稱

辛祕題名 元和十二年閏五月刻正書在登封少林寺

其文右行題云元和十二年閏五月廿九日河南尹辛祕奉勅祭中岳散齋于此寺攷文苑英華牛僧孺撰昭義軍節度使辛公神道碑云祕字常之元和皇帝初元年高選刺史公出爲湖州云云出爲常州刺史升取河南尹朱長文墨池編有此題名云在香山寺今在少林寺靈運禪師碑側埋入土中偃師進士武君億搜得之手拓以歸葉封等俱所未見

狀嵩高靈勝詩 太和三年六月立尉遲汾撰正書在登封嵩嶽廟壁
詩有注引道書仙經世說等皆出初學記唐之詩人守此獼祭也未有熙寧丁巳大梁王綽題字云獲是石于圮墻之下移置壁間汾名見劉昫唐書張仲方傳云李吉甫卒太常定吉甫謚謚爲恭懿博士尉遲汾請爲敬憲韓愈與祠部陸員外書稱尉遲汾出羣之材觀此知昌黎所賞爲不虛矣

東郡懷古詩刻 李德裕撰太和四年六月立隸書在滑縣

朱長文墨池編有此詩刻劉昫唐書李德裕傳云太和三年八月召爲兵部侍郎裴度薦以爲相而吏部侍郎李宗閔有中之助是月拜平章事懼德裕大用九月檢校禮部尙書爲鄭滑節度使今碑以太和四年立其自署云義成軍節度使銀青光祿大夫檢校戶部尙書兼滑州刺史御史大夫正與史合懷古詩二首亦見全唐詩王京兆名尊漢東郡太守楊給

事名瓚宋濮陽太守元和郡縣志云白馬縣河侯祠在縣南一里漢王尊爲東郡太守河水盛浸瓚子隄尊臨河不去後人嘉尊壯節因爲立祠今詩云登城見遺廟卽其祠也顏延年有陽給事誄在昭明文選序云永初之末佐守滑臺李善引東郡圖經曰滑臺城卽鄭之廩延元和郡縣志云滑州城卽古滑臺城相傳云衛靈公所築小城昔滑氏爲壘後人增以爲城甚高峻堅險臨河亦有臺今詩云徘徊望故壘卽其地也河侯祠在今滑縣南一里滑臺當卽縣治德裕有書名李商隱會昌一品集序稱爲隸法道媚金石錄亦有德裕隸書平泉草木記山居詩今不傳

尊勝陀羅尼幢

太和八年三月立呂受撰正書在滑縣

經并有序

尊勝陀羅尼幢

會昌二年九月立僧契元正書在新野

字方二寸許

重刻顏真卿宋州官吏八關齋會報德記

大中五年正月立崔倬敘在歸德南門亭內

寶刻類編有此碑云顏真卿撰并書田悅篆額大歷七年立大中五年崔倬補書在應天此宋州官吏因田神功疾愈爲作齋會也劉昫唐書田神功傳云忠朴幹勇當時所稱而明趙崑以

神功非良臣徐向等媚其主帥非佳事責魯公爲撰爲書蓋以小節掩大功古人不如是矣碑後有刺史崔倬敘石幢事略云會昌中有詔大除佛寺至于碑幢銘鏤贊述之類亦皆毀折瘞藏之此州開元寺先有太師魯國顏公以郡守僚吏州人等爲田氏八關齋會鐫紀大幢時刺史邑宰遂鑿鑿缺敗以仆之蓋口口僅存委埋于土倬於前刺史唐氏之家得其模石本遂命攻追口口殘補緝其次大中五年正月一日敘則此碑毀于會昌刻于大中者也倬實重刻而非補書寶刻類編蓋誤倬見宰相世系表隋義同鄜城公榮四世之孫所書有太和六年四月裴度撰文宣王廟記在襄州見寶刻類編

篆額云唐宋口口州刺史徐向及官吏奉爲汴宋節度觀察使右僕射信都王八關齋會報德記是宣德郎楚邱縣令田說書其篆至劣寫徐爲徐汴爲汴度爲度儼爲儼爲儼爲儼爲儼唐人不通篆學如此汴州以水名卽水經汴水出陰溝于浚儀縣北又東至梁郡蒙縣爲雒水地理志滎陽卞水在西南亦但作卞徐鉉注說文云汴今作汴非是或說隋煬帝避反字故改爲汴然則猶飯作飢之屬也今依隸造篆不成字體若从地里志作卞亦當篆作卞字不應下加、也悅卽神功族子通鑑大歷十四年二月魏博節度使田承嗣薨有子十一人以其姪中軍兵馬使悅爲才使知軍事卽說是也後爲田緒所殺贈太尉見劉昫唐書德宗

本紀

盧鄩女姚婆墓志 大中六年十月立正書盧鄩撰在滎澤

碑云葬于鄭州滎澤縣廣武原附叔祖贈給事中府君之松楸史記項羽本紀云項王已定東海來西與漢俱臨廣武而軍括地志云東廣武西廣武在鄭州滎陽縣西二十里戴延之西征記云三皇山上有二城東曰東廣武西曰西廣武各在一山頭相去百步汴水從廣武中東南流今涸無水城各有三面在敖倉西郭緣生述征記云一澗橫絕上過名曰廣武相對皆立城塹遂曰東西廣武碑云滎陽縣廣武原即其地也

右僕射高元裕神道碑 大中七年十月立蕭鄴撰柳公權正書篆額在洛陽

碑缺撰人名据金石錄書之篆額甚工而無人名碑稱元裕曾祖迥大父魁皇考集銜名皆與宰相世系表合惟世系表誤魁作彪劉昫唐書有高元裕傳亦正作魁知碑是也碑載元裕官爵事實亦較史詳備云贈尚書右僕射劉昫書亦未及舉云歸葬于河南府伊闕縣白沙之南原今碑在縣南三官凹田間是其墓也

韓昶自為墓志 大中九年十二月立子口正書在孟縣

劉昫唐書韓愈傳云昶亦登進士第此昶自述其為張籍樊宗師所賞及為柳公綽牛僧

孺辟薦終于襄陽別駕檢校戶部郎中也昶之孤陋至以金根車為金銀車為時所譏碑中自云其文中字或出經史之外樊讀不能通其誇甚矣又云稍長愛進士及第見進士所為之文與樊不同遂改就從之欲中其彙年二十五及第豈唐時制舉之文已與著作家不同邪碑列三代名銜及後有孤子口書丹篆口其字漫滅似是緝字云葬孟州河陽縣尹邨者今孟縣城西五十里蘇家莊即古尹邨莊南土山有塋周圍數里其東南有冢甚高餘諸冢稍卑俗呼尹丞相墳萬歷間盜掘一小墓得石棄荆棘中樵夫負去將為砧或告于官驗之乃昶墓志也遂封其墓而置其石于韓愈祠壁中近人劉青藜述喬騰鳳說如此因作孟縣韓文公墓考謂大塋即愈墓也

鄭恒崔夫人合葬墓志 大中十二年二月立秦貫撰正書在濬縣

碑云高祖世斌皇左司郎中懿隲二州刺史新鄭縣開國男曾祖元嘉皇新鄭長水縣令襲封新鄭縣開國男按宰相世系表鄭氏有世斌左司郎中子元嘉長水令頗與碑合碑下云祖有常烈考探賢府君諱恒子曰瓊曰瑾曰玘曰璩曰琬此世系表所無世系表又有恒為守忠之子在前數十格不知何故又云鄭之先周皇封舅之地且至以皇為王負環竒之名以環為瓊一大謬即後人偽為之亦必有舊文可据何為若此又一碑文字悉同府君諱恒恒字作遇恐後

人得鄭遇碑改爲鄭恒以衍世者二碑俱在濬縣曠園襟志云鄭恒暨夫人崔氏合葬墓在其水之西北五十里成化閒淇水橫溢土崩石出秦給事賈所纂志銘在焉犁人得之鬻諸崔氏爲中亭香案石久之尋得其家有胥吏名吉者識之遂白於縣令邢某置之邑治或傳此志銘又于康熙初年崔氏見夢于臨清州守守往學宮自穢土中清出据此則碑不識何時移至濬縣臨清之說尤屬傳譌不足信也

左拾遺孔紆墓志 咸通十五年三月立鄭仁表撰并正書在滎澤

紆孔子四十世孫父溫裕祖鄒曾祖岑父皆與宰相世系表合惟紆字持卿世系表則作特卿蓋誤碑中出將下傍注去聲二字金石未有其例又云公謝世之月餘日前與二季處闇室中忽援毫書廿八字於室內東辰之上若隱語而加韻焉曰許下無言棄少年震而不語月書茲風濤渭逆舳艫沒從此無舟濟大川許無言是午字今歲在午也震不語是辰字其哀瘵至甚移歸院就醫是辰日及大然之日驗於官歷是上弦日又應月當茲之讖也其事甚奇異紆爲左拾遺而稱公孔融稱康成爲鄭公漢書亦多稱人爲公是相重之詞近人作碑志執非三公不得稱公之論嫌其太拘也韓愈撰有正議大夫尚書左丞孔戣墓志銘云葬公於河南河陰廣武原先公僕射墓之左是紆數世皆葬于此鄭仁表滎陽人有贈妓僊哥及洛真詩又有經

過滄浪峽長亭走筆題句俱見全唐詩

佛頂尊勝陀羅尼幢 咸通六年八月立曹彥撰李遇正書在許州

碑云造石香幢一永充供養書幢作幢當是古字說文新附始有幢字其實當爲幢从心者古人假音猶勝作幢也西安經幢亦多用幢字徐鉉若能見此必注說文幢下云俗作幢矣

尊勝經幢記 乾符二年十月立鄭昌嗣撰并書在滎陽南寺

幢凡八面文右行字亦疏爽後有記及讚云大唐乾符二年歲在乙未十月十五日建計用功價見錢捌拾貫文米麵共伍拾碩茶二十斤鹽貳拾斤鐫匠李約魯敬存又一面題字云大宋國乾德二年歲次乙丑三月庚辰朔二十五日丙申比邱僧口口發願重建則此幢唐時鐫刻年久倒落至宋復立者也斤拓之字本从禾後省作石此借作碩亦前所未有

謁昇仙太子廟詩碣 乾符四年閏三月立鄭畋撰正書在偃師

朱長文墨池編有此詩詩爲五排字似石經體後有序云余大中八年爲前渭南縣尉又自署云開府儀同三司行門下侍郎兼兵部尚書平章事監修國史按劉昫唐書鄭畋傳云畋字台文滎陽人也以書判拔萃授渭南尉又云乾符四年遷吏部侍郎尋降制曰可本官同平章事僖宗上尊號禮畢進中書書侍郎進階特進轉門下侍郎兼禮部尚書進賢殿大學士頗與碑

合惟史誤兵部爲禮部當以石刻正之傳又稱畋文學優深器量宏恕美風儀神采如玉尤能賦詩與人結交榮悴如一然則當益貴其詞翰矣

佛頂尊勝陀羅尼經幢并銘 乾符五年八月立口筠撰正書在口口

前有序略述婆羅門僧佛陀波利儀鳳元年從西國到五臺山乞見大士文殊師利尊儀見一老人令向西國取尊勝陀羅尼經至京奏帝帝令三藏法師及杜行顗等共譯此經禁在內僧請流行云云凡經幢多有此序蓋得經之源委耳

匡國軍節度使馮行襲德政碑 李宏懿正書在許州

碑字摩滅可辨者云有孫喜者聚徒數千又云軍吏迎謁公在側擊之其事具薛居正五代史列傳云僖宗在蜀有賊首孫喜者聚徒數千人欲入武當刺史呂晁惶駭無策畧行襲伏勇士于江南乘小舟送喜謂喜曰郡人得良牧衆心歸矣但緣兵民多懼擄略若駐軍江北領肘掖以赴之某前導以慰安士民可立定也喜然之既渡江軍吏迎謁伏甲奮起行襲擊喜仆地仗劍斬之卽其事也又云忽有烏鵲羣萃啄食無口又云年口縣麥秀兩岐薛史云境內有大蝗尋有羣鳥啄食不爲害民或艱食必有糴穀出于隴畝亦其事也撰碑人殘缺惟前一行存翰林學士奉數字薛史云遷匡國軍節度使在許三年上供外別追助軍羨糧二十萬石及太

祖郊禋行襲請入覲貢獻巨萬恩詔殊厚尋詔翰林學士杜曉撰德政碑以賜之則此正其德

政碑曉所撰也碑應建于天祐中今僅存八月甲午朔十八日辛亥建云云而已舊惟見篆額

在州治前民舍中人稱長樂王德政碑頃屬知州李君焯掘土出因移置學宮

太子左庶子分司東都上柱國范陽某君墓志 正書在偃師

碑字摩滅惟首行可辨云口口大夫行太子左庶子分司東都上柱國范陽其下缺按范陽當是盧氏有名錯者爲左庶子見宰相世系表未知此是非偃師又有盧東美盧顛二墓亦不敢據以定此碑也

敬善寺石像銘 李孝倫撰正書在洛陽

碑無年月述紀國太妃韋氏造像之美其文甚麗字體亦工其寫鶴爲鶴祕爲秘龍爲龍絜爲絜翠爲翠鳳爲鳳皆別字云南控鸞川按中山經云葦山葦水出焉而北流注于伊水水經注云伊水自熊耳山東北逕鸞川亭北葦水出葦山北流際其城東而北入伊水世人謂伊水爲鸞水葦水爲交水故名斯川爲鸞川也檢今方志無葦水鸞川之目蓋後人俗呼失其音字賴碑碣流傳尋經脈水足証上古禹書非無徵信耳

尊勝經幢 正書在新鄭縣佛寺

幢凡八面字甚工缺其半面惟正書額云上為開元神武皇帝下缺知為唐物也其字甚工當是名人毫翰中州金石記云永淳元年刻今有開元神武皇帝云云則疑未的

嵩岳寺尊勝經幢 正書在登封

無撰人年月字亦甚工未甚摩滅寶刻類編有嵩岳寺題經經首十字曰楞伽阿跋陀羅寶經一部徐浩書天寶中立在洛疑又一幢洛陽伽藍記云嵩高中有閒居寺唐李邕嵩嶽寺碑云嵩嶽寺者後魏孝明帝離宮正光元年崩閒居寺隋仁壽一載改嵩嶽寺

陀羅尼經殘字 正書在洛陽

今為明隆慶時趙岩刊伊闕二大字于上其文尚隱隱可辨後有願捨女身得成男子云云餘惜摩滅明人之不好古往往如此予前撫關中因護送川兵過九嶷山見一碑有宋吳說書諦視之猶得數十字而亦為明人刻上九嶷山絕句詩一首于碑吳說固以游絲書有重名予惜之當與此經殘字裝背成帙也

商王廟碑 樂著撰隸書在安陽

碑為商河賈甲遷于相而作也文不全其號年無攷著自題前中大夫荆王府文學書體亦似唐人故置于此王叔敏以為金時物金無此官制恐非也

梁

葛從周神道碑 貞明二年十一月立張璉撰行書在偃師

碑字多摩滅書人缺名可辨者云故昭義軍節度澤潞等州觀察處置等使開府儀同三司檢校太師下缺云其先濮州鄆縣秦口口人也云曾祖阮祖遇賢父簡贈兵部尚書云青充三寨鯨鯢萬人勦賊無遺輜重皆弃云以功缺部尚書時溥復統全師礪山下寨云退上黨蕃戎喪膽改授懷州刺史屢立殊勳繼膺賞典云落落領二千騎缺馬步二千殺戮殆盡生擒落落奪馬二千云尋授節旄假缺昭義兩使留務口軍周揚五之眾云授宣義軍行軍司馬俄代丁會入潞州云檢校司徒又入井陘攻討并部降李洪範云加太子太師食邑二千戶十月三日歸葬于偃師縣亳邑鄉林口里之別墅皆與薛居正五代史不甚異疑薛据此碑而為傳其子見于碑者次日彥勳金紫光祿大夫檢校工部尚書前守洪州別駕缺次日彥浦殿前口旨銀青光祿大夫檢校太子賓客則史未及載按之歐陽修史所載從周擊晉兵事云從周以精兵自閭門出擊敗晉兵晉王怒自將擊從周雖大敗而梁兵擒其子落落送于魏斬之其言從周兵敗梁兵擒落落甚與碑異薛史則云魏遣其子落落率二千騎屯洹水從周以馬步二千人擊之殺戮殆盡擒落落于陣并帥號泣而去則與碑同此碑

奉勅書撰斷無冒列功狀是歐陽史為失實也歐陽史所載歷官晉秩亦多疏略賴有此証之碑云偃師縣毫邑鄉今之淮廟邨即古西亳湯都也進士武君億跋碑云郵縣史作郵城為梁太祖父嫌名避之周揚五者周德威小字史作陽誤也

唐

重修古定晉禪院千佛邑碑 天成四年九月立釋道清撰正書在武安

俗名透影碑下半毀損有云東魏黃初三年高歡帝所造也以曹魏年號為元魏未審何以謬誤至此又云雜集異記云魏時有大業僧不知生族諸天降食以供其齋忽夜夢二豎僦下於山石邊有大桐樹本堅枝密其僧將法衣袿樹欲掛其樹忽爾開而隼之儼然掩合神力弥縫乃婚媾長於二子後一十二年却至樹邊樹開而缺有虎口菴前師乃以手約杖驅而皆弭伏後之人因其樹号桐禪師之寺焉又改為定晉禪院按太平御覽引談藪曰北齊高祖多殺戮有桐禪師者以業行著稱云云豈即其人與中山經云虎首之山多首桐楮郭璞注桐未詳也說文桐木也而見于此終不知何木

尊勝經幢 長興三年八月立正書在鞏縣淨土寺

幢後題維大唐國洛京河南府鞏縣淨土寺今於當寺建豎尊勝經石幢云云按淨土寺即

魏石窟寺王世充與李密相持世充渡洛水過倉城為營與密戰于石窟寺東即此寺也尊勝經二幢 應順元年正月立雲水最閑正書在濟源龍潭寺

一幢末書祖克用父玩兄河陽節度押衙充濟源鎮遏使下多摩滅亦不知為何人也幢中寫給孤獨園為蘭字尤可怪一幢題雲水最閑書疑亦僧人法號而莫察其姓名也

晉

法行寺經幢 天福三年四月立正書在汝州

字甚摩滅案方志汝州亦未載法行寺

周

尊勝經幢 廣順三年十一月立正書隸額在修武

幢字甚朴率惟題額以幢為幢从心猶用古字說文無幢字徐鉉妄增之當作幢或借幢也

郭進屏盜碑 顯德二年五月立杜韓煥孫崇望行書在衛輝府治

碑云士庶列狀以上聞述去盜之由稱守臣之美宜乎旌其長可其表命之刊勒口其口乃勅朝請大夫行右補闕柱國臣杜韓序而銘之宋史郭進傳云周廣順二年秋遷登州刺

史會羣盜攻劫居民進率鎮兵平之郡內清肅民吏千餘人詣闕請立屏盜碑許之顯德初移衛州衛趙洛間多凶命者以汲郡依山帶河易為出沒伺間椎剽吏捕之輒遁去故累歲不能絕其黨類進備知其情狀因設計發摘之數月間剪滅無餘郡民又請立碑記其事即此碑也据史則登州宜亦有屏盜碑未之見也

黎陽大岨山寺准勅不停廢記 顯德二年五月立馬去非撰正書在濬縣

碑上為勅下為記云大岨山者上摩乾象下壓坤牛左巨浸而右大行以黎山為大岨亦承唐以來相傳之誤蓋是時僧居有勅額者存無者廢故刊此碑于寺後列前黎陽發運使銀光祿大夫檢校工部尚書兼御史大夫上柱國孫郃等名

中州金石記卷三終

中州金石記卷四

賜進士及第兵部尚書兼都察院右都御史總督湖北湖南等處地方軍務兼理糧餉暫留河南巡撫畢沅撰

宋

重修中嶽廟碑 乾德二年八月立駱文蔚撰并行書僧守峯篆額在登封

字去唐未遠猶存格韻後列廟丞廟令及監修官名

西陽明洞記 乾德五年七月立霍錢撰行書在濬縣

碑云大岨山側有龍窟窟之北有石壁每至日昃山半夕陽照明又云定驗其氣嘗至雷發聲

則盛雷收聲則微錢以元年為莊宅副使見而名其洞也

龍潭寺尊勝經幢 開寶六年十月立正書在濟源

字多摩滅亦不甚工

重書龍池石塊記 開寶四年立正書在濟源

碑述漢通谷元年大旱有河內李繼安泛湖至君山廟見朱衣人將書一封稱達至濟源龍池

擊石必有人出此書玉皇勅下濟瀆神行雨李繼安以書扣石事驗因有刻石而重書之也攷

南北兩漢無通谷年號蓋流俗傳說之事不可徵信如此著之碑碣何其謬與

白沙關畫象 開寶六年三月立在光山縣

光山白沙關上古廟後磨厓刻一人形衣冠甚偉左旁書開寶六年三月十二日右旁書省條
開白沙關明一統志云光山縣東南有五關一曰白沙宋紹興間江州都督趙嚴建方志據關
上有天福年字謂建關又在紹興前攷水經注云淮水又東右合壑水水出白沙山東北逕柴
亭西則關以山名也地形志沙州蕭衍置魏因之治白沙關城則自蕭梁前已有此關矣云省
條者蓋宋時中書省勅旨五代史職方考光州為南唐所有至周顯德五年取淮南等十四州
而宋平江南在開寶八年大抵前塞此關以限南北至開寶六年將用師因開是關以通徑途
也予屬今知縣楊君殿梓訪天福刻字及縣中烟水堂李陽冰篆不可復得幸獲此刻楊君並
能考其故實云

新修嵩嶽中天王廟碑銘 開寶六年十二月立盧多遜撰孫崇望行書在登封

其月多遜已為中書舍人參知政事見宋史而碑不列此銜不知何也崇望書郭進屏盜碑甚
瘦勁此又以圓湛勝王世貞弇州山人彙指為吳通微院體之遺予觀宋初人書尚有唐人風
格不似後來逞姿作勢致臨書者未盡其長先受其弊耳

金剛般若波羅蜜經并心經 太平興國二年十月立趙安仁正書在祥符國相寺婆塔

碑為沈繼宗建末有銜名東都事畧趙安仁傳云字樂道河南洛陽人也遷尚書右丞改御史
中丞卒贈吏部尚書謚曰文定滕康翰墨叢記云梁景不善書每起草必用蜀牋趙安仁善書
必用舊紙人號二背

十善業道經要畧 太平興國二年十月立趙安仁正書在祥符國相寺婆塔

碑末列沈繼宗趙字吳載沈繼明李護田誠沈疇時貞李廷温韓奉進宋元與諸人銜名

龍潭寺尊勝經幢 太平興國九年四月立正書在濟源

字甚摩滅此與開寶六年經幢同在一寺

善才寺觀音院記 淳化元年五月立揚口撰梁文素行書并篆額在禹州城內天寧寺

碑文漫滅不可讀蓋述寺僧從軌興修之事楊君時為宣補鎮邊使亦見于碑按今方志無善
才寺則寺廢久矣天寧寺中復有宋仁宗御書天竺唵斛囉字碣恐亦不存也

西京白馬寺碑 蘇易簡撰并正書在洛陽

碑甚摩滅斷為二截有云 馱經之地口其由口中國招提之始按洛陽伽藍記云白馬寺漢
明帝所立也佛入中國之始寺在西陽門外二里御道南帝夢金人長六項皆日月光明胡神
號曰佛遣使向西域求之乃得經像焉時白馬負經而來因為名故碑亦云也碑年月殘闕

惟存禩四月八日及前有翰林學士承旨朝請大夫中書舍人上柱國賜紫金中缺簡奉勅下
缺云云知為蘇易簡也中州金石攷云只存上截今予所得有下截云易簡入為右拾遺知制
誥除翰林學士淳化中充承旨見東都事畧本傳則此碑淳化時立故置于此

夏家堂經幢 至道二年四月立正書隸額在汝州

幢正書題額云佛頂尊勝陀羅尼真言中書經文後書同造人及會首同會人名

趙玘改葬碑 咸平二年七月立子惟永撰姪嚴正書勾中正題額在汝州

按碑玘葬于浚儀縣旌孝鄉黃渠里又改作墓事扶護神柩安葬于山莊之右蓋從浚儀改葬
于汝時惟永撰碑以紀之并述玘行事也攷薛居正五代史周世宗本紀云顯德二年閏九月
壬子西南面招封使王景奏大破西川賊軍於黃花谷癸丑秦州偽命觀察判官趙玘以本城
來降詔以玘為郢州刺史東都事畧趙普傳云普遣親吏市木關隴吏私市大木昌稱普所市
以規利前三司使趙玘以白太祖詔問太子太師王溥等普當何罪溥等奏趙玘誣罔大臣乃
出玘為汝州牙校事與碑合未為惟永自述其隱逸之行碑凡四面字起左側又有曾孫口捧
硯皆金石未有之例

建河南廣武原宣聖家廟碑記 大中祥符二年十月立王羽騰撰正書篆額在滎陽

碑云祥符元年駕幸曲阜釋奠廟林賜孔氏男女錢帛有差又云四十五世孫孔延世襲封文
宣王奏曰孔氏尚有隨駕參軍孔晃一枝住在河南廣武原族也上召晃問曰臣祖孔戣任唐
禮部尚書國公孔緯皆荷先朝御葬廣武原子孫守墳奉祀隨口遂不能以東歸上喜賜口帛
有加策命留守王羽騰來原建修家廟云云按宋史云至道三年九月以孔子四十五世孫
延世為曲阜縣令襲封文宣公東都事畧云大中祥符元年十一月幸曲阜進謁文宣王廟
加上文宣王曰元聖文宣王正與碑合宰相世系表曲阜憲公務本頴達族孫子如珪如珪
子岑父岑父子戣戣子溫孺溫孺子緯緯弟紆今滎陽有左拾遺孔紆墓志知孔子後廣武
一枝實非誣也

龍門銘 大中祥符四年三月立真宗正書并篆額在洛陽

李燾通鑑長編云大中祥符四年二月辛酉具法駕詣睢壇三月巳卯車駕入西京今碑云
躬薦兩圭祀汾陰而祈民福言旋六轡臨雜宅而觀土風卽其事也玉海云祥符四年三月
癸未作游龍門詩有寶塔一新輝勝槩玉臺口飾罄殊功之句又作龍門銘書史會要稱真
宗善書得晉人風度觀此碑欲出蔡襄之上宋代未有過之者朱子評書云書學莫盛於唐
然人各以其所長自見而漢魏之楷法遂廢入本朝來名勝相傳亦不過以唐人為法至於

黃米而敬傾側媚狂怪怒張之勢極矣朱子之言如此予觀真宗書乃無此弊當時見之得不懣然心服邪

石保吉神道碑 大中祥符四年十一月立李宗諤撰白憲行書并篆額在洛陽石碑室

保吉守信之子保興弟傳俱見東都事畧白憲書復有大中祥符七年中嶽中天崇聖帝碑在登封字亦端雅

石保興神道碑 大中祥符四年十二月立楊億撰尹熙古行書并篆額在洛陽石碑室

保興守信之子碑載事蹟與宋史頗合而歷官較詳云建隆初以任子之令補東頭供奉官俄遷尚食副使即拜如京使命為御營四面都巡檢未幾領順州刺史太宗以為御寨四面都巡檢中原平加實封下命為高陽關駐泊都監會先王捐館有詔起口口口將軍順州團練使命為銀夏綏麟府州故關都巡檢使俄丁內艱中旨抑奪出為澶州駐泊都監未幾知莫州軍州事俄為西京水南北都巡檢使月餘真拜蘄州團練使京兆府駐泊兵馬鈐轄兼管華耀乾商巡檢兵馬捕盜等事徙為延州路鈐轄兼管界都巡檢使至道中命范廷召為都部署俾公副之命知威虜軍事就拜棣州防禦使以足疾移知邢州又改知澶州事賜告家居以宋史本傳勘之惟保興太祖時即為御營四面都巡檢及加實封云云史未及載又

保興先為銀夏綏麟府州故關都巡檢使丁內艱起為澶州駐泊都監史載澶州駐泊在徙銀夏綏府都巡檢使之前當以碑為正餘銜亦少有異同碑云公本名貞太祖改錫今諱史云本名保正太祖取興宗之義改之東都事畧亦作保正宋人避仁宗嫌名故也按碑保興葬于河南洛陽縣平樂鄉宣武邨梓澤原之先塋今墓見存尹熙古者書史會要云官翰林待詔工篆得撥鐙法所書為一時之絕觀其行書有唐人風格而出于王右軍信可愛也東都事畧保興傳甚畧而宋史甚詳當据此碑而作然則金石之傳其功不小矣

中嶽中天崇聖帝碑 大中祥符七年九月立王曾撰白憲行書并篆額在登封

李燾通鑑長編云大中祥符四年五月詔加上中嶽曰中天崇聖東都事畧載其詔曰峻極之嶽神靈主焉其加上五嶽帝號即碑所云也白憲書名不甚顯觀其筆蹟雖使蘇靈芝李邕為之不能復過北宋人物之盛亞于唐代矣

重修淮瀆長源公廟記 大中祥符七年十一月立路振撰楊昭度行書并篆額在桐柏淮源

廟中

長源公者唐時封號太平寰宇記云淮瀆舊有淮瀆令掌此祠唐天寶中封淮瀆為長源公廟中有石龜十枚極大此述開寶中遣使視廟詔營繕之及祥符嚴飭嶽鎮海瀆之望也昭

度書畧似唐太宗宋時館閣諸臣工書如此文亦整飭可觀

重刻白居易詩 大中祥符八年閏六月立段羣玉行書在濟源濟瀆廟

金石錄有太和五年白居易游濟源詩馮宿詩附今後有太和五年題字又一行云段羣玉

重書立似居易詩刻北宋時已失之因重刻于石宜今訪之不得但不知趙明誠何以見其

原刻耳

摩騰入漢靈異記 天禧五年正月立僧景遵行書在洛陽白馬寺

長興三年二月八日記天禧五年二月七日重建景遵無書名而字體絕類聖教序北宋人

書猶有晉唐風格良可愛也

增修中嶽中天崇聖帝廟碑銘 乾興元年六月立陳知微撰邢守元行書在登封

碑為大中祥符六年癸丑至乙卯歲增修殿宇創造碑樓而作陳知微宋史有傳邢守元書

亦謹飭似唐人又有所書北嶽安王聖帝碑

濟瀆詩 天聖三年十月立張旻撰男得一行書在濟源

詩五言六韻有序云余自天禧元祀解宥密之職首治是邦越朞月而移他郡于今八載復

領藩政時旻為淮南節度使判軍州事謁廟所作也銜名正書甚工詩及序行書多用曳筆

取姿致字體敲側唐人規格于是決裂盡矣

龍門佛龕題名 天聖四年三月立正書

碑凡八行行十字云西京龍門山大象龕題名三班借職監伊河竹木務兼本鎮煙火修整

石佛石道公事口口弟祐并仲子觀鄉友口吏顏翰安定胡汎同至此大宋天聖四年丙寅

三月二十六日書鐫手李口其文右行字亦有筆力惟寫鄉為鄉甚謬

濟源縣令陳省華善政錄 天聖九年四月立楊虛已正書在濟源

虛已行書習王羲之正書亦似歐陽詢宋代書法之工者而其名不顯何與

賀蘭棲真勅書并詩序碑 天聖九年十月立汪仲詢撰楊虛已行書在濟源

碑分三格上層為勅書并詩中層為張齊賢陳堯咨詩下層為序序知縣事裴德滋刻石之事

也棲真宋史有傳虛已書甚工又有延慶禪院修舍利塔碑云習王羲之書風格極似乃歎古

人仿古之精如此張齊賢陳堯咨史皆有傳

永安縣緱山通天觀重修昇仙太子大殿記 明道二年六月立謝絳撰僧智成正書王顧篆額

在偃師

碑文工整字亦端秀有唐虞褚風格緇流辨此當有書名而不聞其人或有捉刀者與

會聖宮碑銘 景祐元年九月立石中立撰李孝章正書并篆額在偃師

宮在北邙山鳳臺山上爲宋時祭陵飲福之所宋史云天聖八年春正月作會聖宮于西京永安縣以奉三聖御容歐陽修亦有會聖宮頌云國家采漢書原廟之制作宮于永安以備園寢碑立于景祐蓋天聖年作宮至是始成也宋時永安金改芝田縣今爲偃師芝田鄉碑云按地誌訾王山者冠於諸阜僉曰隩區考水經注洛水又北逕偃師城東東北歷鄴中逕訾城西司馬彪所謂訾聚也訾王山當以訾聚得名矣

索長官畫象并廟創塑部從記 景祐二年三月立梁佐撰正書篆額在密縣

畫象在索君墓上墓去縣里許向聞其刻因飭縣令訪得之碑畫一官二從者一老嫗一獸形但無款識年月按方志載索長官於五代時宰密虎入境噬孀婦王氏子婦訴長官牒追虎卽銜牒至庭長官叱使出境虎患遂絕其廟中景祐碑文云索長官未知何代人也雖祀典不載據圖經所述云昔宰是邑之日有惡獸入境屢爲人患遂於公介中選有膽勇者一人令執牒而往追之懼其見啗乃致於行徑中而復其獸見之自嚙牒而至訟庭踞地而伏公實仁慈惡殺惟再三懲戒叱責而已良久捨之放令出境而去所記無孀婦王氏之說又不云五代人不知方志更何所据今畫象在墓前碑記在廟中索長官若五代人則畫象亦刻于此時矣以無

字跡可考故連屬于廟記其記篆額甚劣如寫廟从因寫絕爲絕之屬又篆額有塑字攷說文玉篇所無惟見廣韻云塑像也又有堞字云捏土容蓋後人造作此文今因隸爲篆不經甚矣碑因寄居蔡興塑部從于廟之事而作也

延慶禪院新修舍利塔記 景祐三年六月立馬元頴撰楊虛已行書郝黯篆額在濟源

題云江陵楊虛已習晉右大將軍王羲之書其書極似聖教序古人摹仿之工如此碑中有云涅丈六之身槃四八之相涅盤二字出妙法蓮華經云我法離生老病死究竟涅盤今分用其字前所未有

濟源延慶寺范坦陳堯佐詩刻 景祐四年十一月立陳學古正書在濟源

學古堯佐第三子堯佐遺書范坦詩及已詩于碑後有景祐三年陳諭范宗傑攜挂寺閣題字又有景祐四年馮求已祝諫同移題字歐陽修爲堯佐神道碑云明道二年知永興軍又云累官戶部侍郎景祐四年召拜同中書門下平章事蓋此時爲詩也范坦見宣和畫譜云字伯履洛陽人以蔭補官長於吏事所至皆以明辨稱善丹青作山水其筆法學關仝李成延慶寺唐垂拱初建河南通志誤以范坦詩爲黃庭堅詩急宜改正

淮源廟鐵鐘識 慶歷三年二月立正書在桐柏

上題唐州二大字下列朝正大夫行汝陽縣令口大德右侍禁監消稅務杜策口口供奉官唐州兵馬監押口口口巡檢寇口朝奉郎守殿中丞唐州監消稅務上騎都尉賜緋魚袋李口朝奉郎守尚書屯田郎中知唐州軍州兼管內缺尚口將仕郎汝陽縣尉兼口口事尹貽孫將仕郎守司法參軍王口口登仕郎守唐州司理口口口下列拾鐵捨禾人名後題都維那頭楊興造作人男尹光大宋慶歷三年歲次癸未二月己亥癸卯日錢字作禾已見于此或云泉字草書

龍潭寺題壁絕句詩

慶歷三年五月立任布撰黃孝先行書在濟源

任布時為尚書工部侍郎知河陽三城賫御署祝文詣濟瀆廟遊龍潭寺與僧話陳中令為邑大夫樞相太師太尉昆仲皆曾聚學是院今樞密太尉杜公麻衣時亦常遊處作詩以慰僧之自嘆也籠沙故事往往有之豈以此調寺僧歟孝先時知縣事字甚工

題龍潭詩

皇祐五年十二月立富弼撰正書在濟源

詩云亂山深處一龍潭竹削琅玕水潑藍更倚雲巖構蘭若直疑風物勝江南乾隆四十九年春河北道康君基田濟濟西源潭得之前人未之見也碑字甚方整筆力似顏真卿書史會要稱弼擅豪翰其蹟禩見羣玉堂法帖中

梅歐唱和詩

至和元年十月立隸書在滑縣

此詩當是梅摯知滑州事時所作也并書歐陽修和詩碑無書人名意摯自書之

范仲淹神道碑

至和三年二月立歐陽修撰王洙隸書在洛陽

碑記仲淹召拜右司諫當太后臨朝聽政時以至日大會前殿上將率百官為壽公上疏言天子無北面云云宋史載其事在拜右司諫前云太后崩召為右司諫東都事畧云出通判河中府久之仁宗記其忠召為右司諫在上疏後下云章獻崩又各不同碑云為環慶路經畧安撫招討使兵馬都部署史云為環慶路經畧安撫緣邊招討使與碑微異其餘頗同此碑隸書隋勁多帶篆體真出唐人隸書之上惜下截及書撰人名字多漫滅杜大珪名臣琬琰集載其全文是歐陽修所著也王洙宋史有傳墨池編稱其晚喜隸書尤得古法當時學者翕然宗尚而隸法復興中州金石攷云有仁宗篆額褒賢之碑今未搨得

龍潭留題詩

至和丙申年三月立何嶠陳君章撰正書在濟源

何陳各賦五古一章為院主僧清平所立而無書人名紀歲至和丙申蓋三年也

大閱堂記

嘉祐元年十一月立梅摯撰楊稷行書在滑縣治內

碑云東都大閱堂今三司使端明貳卿張公出牧日經始之又云子幸承攝明年春乃率僚吏

落而按之是時摯知滑州成此堂也摯字公儀成都新繁人宋史有傳云擢天章閣待制陝西都轉運使還判吏部流內銓進龍圖學士知滑州州歲備河調丁壯伐灘葦摯以疲民奏用州兵伐之河大漲將決夜率官屬督工徒完隄水不為患詔獎其勞勾當三班院同知貢舉此銜云龍圖閣直學士尚書吏部郎中知滑州軍州事正與史合摯知滑州惠政皆見于史後人當何如重其文而并護其遺石邪中州方志至漏畧予故為摯史事著于編

翊聖真君祕誥 嘉祐五年七月立正書在登封文昌宮

嵩陽石刻記云在崇福宮字法方整近顏書

二體石經周禮殘碑 嘉祐六年五月立章友直楊南仲篆書在陳留

玉海云仁宗命國子監取易詩書周禮禮記春秋孝經為篆隸二體刻石兩楹嘉祐三年五月十五日王洙薦大理丞楊南仲石經有勞賜出身六年二月一日國子監言草澤章友直篆石經畢詔補試將作監主簿友直不願仕賜以銀絹五月以同篆石經殿中丞張次立與堂除故書史會要稱楊南仲與章友直篆石經又有張次立同篆也今僅存周禮卷一及卷五中數石中興館閣書目石經七十五卷楊南仲書周易十書十三詩二十春秋十二禮記二十皆具真篆二體獨無周禮不知何故此石篆書甚工但多別字敘从支今从又臧即藏今加艸是皆依

正書作篆不加考古之過于古文桃當為濯見周禮注詔當為紹見禮記注今亦不能考正其文僅用徐鉉新附為之亦甚凡淺予嘗見蔡邕唐元度等經石皆有變體李陽冰自願書經觀其他刻石亦不盡合篆法蓋一代立石經之時欲求通六書人又能作篆書者固亦難矣經云凡王后有操事於婦人今板本作慘事周密癸辛襍識云汴學即昔時太學舊址九經石版堆積如山一行篆字一行真字予撫中州釋奠費宮即詢是刻不可得學官云修學時用作餽餽矣僅存陳留數石豈不惜哉

韓愷墓志銘 嘉祐七年十一月立韓琦撰并正書在安陽

碑云愷字和仲余姪殿中丞公顏之次子又云乃于相州安陽縣新安邨先塋東百步之近得地吉用丙穴以葬愷蓋附國華冢也方志載韓氏墓甚祥獨遺愷墓賴有碑碣以存之耳

宋仁宗飛白碑記 嘉祐八年十一月立御書飛白字吳充撰記并正書陳知和隸書題額在偃師

碑上層為飛白書帝字旁題云勅建大招福寺家佛堂賜進士翰林院學士陳帝字下有寶畫下層為吳充記所述陳口喪母在家先帝棄羣臣因刊御書于先墓之廬也賜書者嘉祐八年正月亦見記中翰林作翰林尤前人所未有宋史本紀云至和七年幸寶文閣為飛白書分賜

從臣歐陽修歸田錄云仁宗萬幾之暇無所翫好惟親翰墨而飛白尤為神妙也玉海亦多稱仁宗飛白書

韓國華神道碑 嘉祐八年十一月立富弼撰王珪正書在安陽木谷鎮國華即琦之父琦相仁宗乃立此碑

書錦堂記 治平二年三月立歐陽修撰蔡襄正書卻口題額在彰德府治北

此宋韓琦以丞相判鄆郡建于居第者也琦第別有榮歸虛心二堂其後曾孫曾守相又建榮事堂襄字方正為一代絕手此碑尤名于時容臺集稱為每一字書數字擇其合作者存之名為百衲碑乃別體不乏寫功从刀矜从子學書者宜棄其短也錢少詹云琦初封衛國晉封魏國歐陽作記時稱衛國是也板本作魏國公誤甚矣當以碑為正

陳述古題名碑 治平丙午五月立正書在濟源

碑述先祖太師中令秦國公孟父中令大父太尉相公季父太尉康肅公肆業精舍仲弟求古同遊稚子知雉知方知白知十侍行書于寶元己卯至治平丙午男知素為濟源縣尉乃立石云其書石行秦國公名省華長子堯叟次子堯佐季子堯咨述古求古堯佐子歐陽修撰有太子太師致仕贈司空兼侍中文惠陳公神道碑銘紀歲治平丙午蓋三年也

新修晉太尉嵇公廟記 熙寧二年八月立韓琦撰并正書在湯陰城西南

此琦因湯陰令張懋修廟而記其事也太平寰宇記云湯陰縣浣衣里晉侍中嵇紹葬所按鄴中記志帝師敗湯陰千官皆走獨紹端冕帝側以身捍主遂至見害血濺御衣及事寧左右欲浣之帝曰此嵇侍中之血勿去也詔葬縣南因名此地為浣衣里是紹墓亦在今縣城西南也墨池編稱韓魏公書骨力壯偉書史會要稱其工正書師顏魯公頗露圭角信然

秦王宮諸喪祔園記 熙寧五年五月立吳道簽正書在汝州

此記詔舉諸喪祔葬及監護專治脾山祇役執事等人名秦王名廷美葬在州城北二十里祔兆凡二十餘家

郭崇妻造象記 熙寧五年五月立正書在滎陽

文云滎陽縣郭下郭崇妻魏口奉為生身父母亡過者速生天界見存者福樂百年特發願心資薦造釋迦佛聖像一堂又為男五哥女子十三姑造大阿羅漢十六尊願合家清吉永保康寧家眷昌隆之盛大宋熙寧五年五月日建院住僧法經

宗室陳國公祔葬記 熙寧六年六月立馬士明正書在汝州

此記陳國公以熙寧六年正月薨有詔葬于汝州梁縣秦悼王墳之次及祔諸喪并作坊專董

瑩兆人名

為哀男清孫造佛像記 元豐元年九月立常景撰并正書在洛陽

碑文甚哀婉字亦秀美云以其平日所遊最樂香山之勝故鵲口于佛室之前鏤其容於口以追薦之是并刻清孫象也云曾王父書贈屯田員外郎王父吉贈光祿少卿又有祖母母妻姓氏景即其父也

大廟條約 元豐元年八月立正書在桐柏淮源廟

其文摩滅已甚恐今仆毀矣篆額弔字作絕以从勺之字从口謬甚家以珣以此碑打本及淮源廟宋元人題名見詒因為著錄以珣文登人以名諸生遊京師頗以經學見重于時也

韓魏公祠堂記 元豐七年六月立司馬光撰蔡襄正書在畫錦堂記碑陰

碑下半漫滅缺書人名以字體知為蔡襄筆也琦廟在畫錦坊

留題濟瀆廟詩 元豐壬戌仲春立文彥博撰正書在濟源

詩為七言律詩字亦方正似顏真卿彥博時署河東節度使守司徒兼侍中判河陽軍州事應是其自書後題壻薛昌謬立石予誦其詩有未嘗輕作波濤險唯有涵濡及物恩可以想見太平宰相之度紀歲元豐壬戌蓋五年也

相國寺尊勝經幢 元祐五年二月立正書在祥符

明一統志云相國寺北齊天保年間創建今寺遭明季兵火及河流入城圯而復建古刻遂盡惟留此幢在寺右廊宇多摩滅矣

傅堯俞疏 元祐六年九月立李格非撰黃本行書在濟源

疏為乞置僧院看管先塋事傅堯俞東都事畧有傳黃本字亦甚工有唐人格韻

楊彥則任永夫題名 元祐四年十二月刻任永夫行書在淮源廟

題云杜陵楊彥則河南任永夫同此遊樂道士楊作實預焉元祐乙巳冬十二月己亥永夫閑誌其字甚工有唐張從申風格

洪谷峯神燈記 元祐庚午十月立張商英撰并草書在林縣

時商英按民兵過相臺提點監牧殷仲容為言林慮洪谷峯有聖燈乃見之因記其事于石字亦奇偉可觀張商英宋史有傳云字天覺崇寧初拜尚書右僕射謚文忠冷齋夜話云張丞相好草書一日得句索筆疾書滿紙龍蛇飛動使姪錄之當波險處姪罔然而止執所書問曰此何字丞相熟視久之曰胡不早問致予忘之紀歲元祐庚午蓋五年也

坦掌邨重修堯廟碑 紹聖二年十一月立李勃吳愿撰張洞正書在河內

碑云按覃懷圖經云郡城乾隅三十餘里古有堯聖廟境雖群經不載諸子無文况詢諸耆艾

傳乎古老昔帝因巡狩師帥至此隨誌三皇述職五帝巡狩者是也困息思漿求无獲濟忽覩斯境猶掌潤澤

帝迺聖意陰符龍指按担尋感醴泉應手源涌无涯故因而邨名担掌鄉號利仁其事甚鄙俚

今府城北有堯河灌田甚為民利又有堯池在太行山陽即此所稱也碑以懇堂懇構為官堂

官構其文之劣可知兩人合撰之例亦前所未有也

題巢父亭詩 紹聖四年三月立羅適撰正書在汝州

詩云泊然一枝巢常靜不待息天地存遺井聊以見清德窺者見爾心飲者養爾力何為病

夏畦俯仰無慙色字不甚工今有巢父井在汝州城西郭門外明一統志云旁有巢由廟宋

宗舜臣刻王通叟弔巢父文於石

賀蘭栖真詩像并記 紹聖四年十月立真宗撰詩張閭撰記正書在濟源

碑分三格上層御賜詩中層畫栖真像騎驢前一童下層張閭因道士郭琨屬為記也述栖

真一百一十有三歲葬于奉僊觀之東宋史賀蘭真傳云不知何許人居嵩山紫虛觀張齊

賢與之善真宗作二韻詩賜之大中祥符二年卒時大雪經三日頂猶熟事與碑合而王銍

談苑有賀蘭歸真真宗召對問點化術歸真奏曰臣請言帝王點化之術願以堯舜之道點

化天下可致太平其事亦出此碑然則誤棲真為歸真非兩人也河南府志並載夫之攷古矣

宋時道家揣摩人主之意特借堯舜之道文飾其術夫帝王治法豈方士所知驗諸設施則其

伎立窮矣

韓宗厚墓志 紹聖五年九月立朱光裔撰杜紘正書在許州

宗厚韓億之孫緯之子東都事畧無緯傳故宗厚亦不見于史按碑載宗厚歷官自光祿寺丞

四遷至承議郎賜六品服所涖之地多能興水利斷疑獄文繁不具載又云嘗上書言元祐間

更按問法天下斷獄死者滋眾請復舊條乞比較州縣獄死之囚數多者行罰事皆可傳又云

王文公為世儒宗樂教育後進君嘗執經請益既輔政屢欲用君而齟齬不諧是宗厚不附安

石尤可嘉尚蘇軾以為王氏之學好使人同已化天下皆為王氏之學一望皆黃茅白葦蓋是

時如宗厚者固少矣杜紘字亦有唐人風格碑云葬于潁昌府長杜縣嘉禾鄉靈井里先塋之

次是亦耐億也今方志亦載億墓而遺宗厚墓

韓宗道墓志 元符二年七月立曾肇撰趙挺之正書在許州

宗道韓億之孫綜之子東都事畧韓綜傳云子宗道元祐初為戶部侍郎寶文閣待制餘無所

及宋史亦同碑述宗道在朝數言事嘗請擇守令明黜陟以覈能不立嫁娶喪祭之制使貧富

各安其分詔有司節浮費興遺利量入為出以制國用有文集二十卷可補史之缺碑字亦完

好今億碑在許州城東北三十里碑云葬長社縣嘉禾鄉耐忠憲公兆是耐億葬也方志失載

宗道墓非是趙挺之宋史有傳書史會要稱其工筆札其蹟確見鳳墅續法帖中蓋未觀此碑

重刻唐李翰拜比干廟文 建中靖國元年正月立張琪正書口口題額在汲縣

琪時為汲縣簿所書李翰文字體秀整在唐人中亦為絕手而無書名者豈以位卑邪

題期思遺愛廟詩碣 建中靖國元年九月立張孜撰戴元正書在固始

詩七律碣在期思孫叔敖廟期思今固始鎮名水經云淮水又東過期思縣北酈道元注云縣

故蔣國周公之後也春秋文公十年楚王田于孟諸期思公復遂為右司馬楚滅之以為縣城

之西北隅有楚相孫叔敖廟廟前有碑按碑是漢延熹二年立遺愛廟是宋元豐八年勅賜額

也張孜名缺以舊志知之

勅賜靜應廟牒 崇寧二年五月立正書在河內

此即宋時所重書上石之牒文因知縣事陳崇祈兩應驗而賜魏夫人廟號也其原紙牒文至

承安時始依式上石見後卷

汝帖 大觀三年八月立王采摹在汝州

帖舊在州治望嵩樓上四方摹搨者多有司苦之明嘉靖間詔毀天下淫祠乘此廢去瘞馬廐中後復燬于火

國朝順治七年巡道范承祖懸賞購之方得大半命匠人移置道署會稽亦有翻本黃長

深譏其謬帖中有篆書宗資石獸天祿辟邪字集古錄云漢天祿辟邪四字在宗資墓前石

獸膊上按後漢書宗資南陽安眾人也今墓存鄧州南陽界中墓前有二石獸刻其膊上一

曰天祿一曰辟邪如集古錄所云及此所摹是實有字而明楊應奎重鐫宗資墓記云啟而

築之細尋其字無有也又云故以法帖舊文模而鐫之則其字明時已失不知何也宗資為

南陽太守墓在南陽縣北三里今所存之字既楊應奎所鐫無足取矣其蹟為中州石刻賴

有此帖存其形似好古者幸無忽之或荒虛古道復出于後世存此以備考証亦不為無益

云爾

漢太尉紀公廟木帳記 大觀四年八月立周頴撰蔡靖正書李延賁篆額在滎澤

碑云武聖皇帝西幸又始口口太尉似述宋時封號紀信以唐麟德二年贈驃騎大軍見劉

昫書又以宋封太尉忠義之感人深矣

游奉仙觀詩 大觀己丑六月立魯日損撰正書在濟源

中州金石記四

詩為七言絕句因陪道淳左藏遊奉仙觀感二魯真人得道之所而作也詩與字亦不工
贈魏王告祠勅 政和三年五月立李昌邦行書在汝州

此秦王廷美追封魏王勅以元符三年三月十四日下政和三年五月初十日管轄添修墳
園吳口趙令訖立石字體佚蕩開米芾之先矣

浮邱公靈泉記 政和四年五月立張挺撰張當世正書在偃師

碑云崧高之下曰緱氏山距山不遠遺冢具存民俗傳為浮邱藏劍之所即其巔構祠以祀
焉又云政和二年夏月泉出庭下人初易之俄鷗息泳者輒死病者請禱飲之即愈按其泉
今在縣南三十五里既而久涸乾隆初復出也

頓逢原題名 政和口年刻頓逢原正書在桐柏淮源廟

題云後廿有一口子逢原以從事口口口事奉郡檄春祭祠下口覽先君口口留字感愴
久之政和口口正月二日頓逢原書房準口實刻

豐澤廟封康顯侯勅并記 宣和元年三月立黃翰撰并行書在濬縣

碑上為勅下為記勅以政和八年閏九月十三日下署太師魯國公臣京免書及諸臣名尚
書吏部告印下記徐公由尚書郎洩二千石禱雨有應奏請封爵之事翰時為州學教授其

書法絕類蘇文忠軾豈以翰官卑名不逮之與宋時勅牒體例具見于此足資掌故也

蔡興宗題名 宣和元年十二月刻正書在桐柏淮源廟

題名宣和元年十二月庚子歲立春日郡從事蔡興宗奉御名祝詞致祭于淮濱長源王廟
下其文右行

白金泉銘 宣和乙酉立徐闕中撰正書在濬縣

碑云汶山之陰厥有一泉出石亭間世傳玉女修真之地泉之東有巨阪伏如瓦溝號拖裙
石而泉獨無名予慨然口筆題曰白金又云玉女姓氏不顯于世按明一統志云紫金山在
濬縣東北六里大岬山東相傳古玉女修真于此上有玉女觀白金泉拖裙石玉女巖仙跡
然則汶山即紫金山矣俗失其名考乙酉為建中靖國四年而以宣和紀歲不可解也

封清源忠護王勅 宣和七年九月立書在濟源

勅云屬者寇發鄰郡將犯縣境邑人奔走禱于爾大神雷雨迅興沁河有湯池之險旌旗歛
列南岸象羽林之嚴賊徒褫魄以威奔閭里按堵而相慶未署起復少宰兼中書侍郎臣邦
彥宣中書侍郎臣張邦昌奉中書舍人臣莫儻行蓋宣和六年郡縣守吏往往以軍法誅民
河北盜起七年正月詔告諭河北河東盜賊赦罪放租然當時國家懦弱恃禱神布恩以

為弭盜之術則盜去而金人來矣東都事畧云宣和二年張邦昌中書侍郎六年夏四月李邦彥以父憂起復九月李邦彥少宰兼中書侍郎正與碑合

題觀魚軒詩 韓琦撰并正書在安陽

碑無年月不云并書玩其字跡即琦筆法也琦築忘機堂在彰德府治北前有狎鷗亭又前有觀魚亭

伏羲廟題太昊陵字 行書在陳州府治

伏羲廟後有土敦高二丈許前有碑題為太昊伏羲氏陵俗傳朱子書或云蘇轍書攷史記司馬貞三皇本紀注云按皇甫謐伏羲葬南郡或曰冢在山陽高平之西也則伏羲陵不在陳州府治水經注沙水又東南逕陳城北故陳國也伏羲神農並都之城東北三十許里猶有羲城元和郡縣志云宛邱縣八卦臺及壇在縣北一里古伏羲氏始畫八卦于此則此乃伏羲治所及畫卦之臺不得指為陵也又按寶刻類編有光化中伏羲廟碑孫命撰趙穀書并篆額亦不云陵今祀典祭在此者承宋元之舊亦以南郡高平之陵既失古帝神靈無所不在歟湯陵在偃師而祭汾州周文王武王陵在長安而祭咸陽亦有舉莫廢之義也伏羲廟既古今周覽庭宇并光化碑亦已亡失蓋修廟時類皆磨去舊文刻近人碑記殊可惜也

南禪寺經幢 行書在汝州

幢字甚摩滅後一行云大宋口口口歲次乙卯二月壬子朔廿一日夫口劍州衙內指揮使張口建餘不可讀寶應寺在汝州治東南元時亦名南禪寺世傳唐開元初建明洪武初重修置僧正司焉

廣慧寺石幢 正書在汝州

幢字漫滅可辨者云初五日遷化于汝州等慈禪口又云同業龍興寺七祖_下沙門景規又云六月丙子朔二十四日其上正缺故不能辨其為唐為宋也七祖者唐元宗所謚貞禪師之號

法雲寺石鼎文 行書在獲嘉縣

文甚摩滅諦視其殘字乃是行書心經前又有正書有法郭二字可辨其為唐宋物不可知矣方志載明洪治間僧鑑蓮修此寺並徙石佛石鼎各一座鼎柱刻慶歷四年則此經宋時所書縣官未搨柱上款識來耳心經字體與懷仁所集王右軍書正同

中州金石記卷四終

中州金石記卷五

賜進士及第兵部尚書兼都察院右都御史總督湖北湖南等處地方軍務兼理糧餉暫留河南巡撫畢沅撰

金

朗然子詩 天德二年正月立劉希岳撰王琳正書在洛陽棲霞莊

朗然子即劉希岳字望高章水舉人棄儒入道碑云朗然子者昔唐通元觀主也事跡靈異修煉非凡隱世百載至宋端拱年於桃花坊白日昇天矣勅改名集真觀有遺詩二十首於世至政和元年觀主道士張道言小師周抱真立石後改名萬靈朝元宮值兵火損壞碑跡於天德二年正月初五日本宮道士趙隱微尋獲元昏碑一本道士張道冲重刻石葆光道人王琳書今觀其序及詩甚劣而所說甚奇異將道士造作其事術世者邪予覽金石之例凡為道家作志銘于其卒也必曰白日昇天或曰蛻去猶為釋氏立詞曰圓寂曰涅槃之類即儒家稱卒與終耳後世不解讀其碑則以為仙也晉書稱葛稚川吳時學道得仙亦史家誤會碑碣之文歟常樂寺重修三世佛殿碑 正隆四年四月立胡礪撰翟炳正書郭源篆額在武安

碑云鼓山南則溢水出焉上有二石如鼓形世傳鼓鳴則有兵起質諸傳記北齊之末此鼓常鳴而齊為周所併隋文帝末年鼓又自鳴而唐代隋以興一名神鉦按太平寰宇記云溢陽縣

鼓山亦名滄山宋承初古今山川記云鼓山有石鼓形二所南北相當俗語云南鼓北鼓相去十五里冀州圖經云鄴城西有石鼓鼓自鳴即有兵魏都賦云神鉦迢遞於高巒是也高齊末鼓鳴未幾云鄴城有兵而齊滅隋文季年又鳴聞數百里也正與碑合予按鼓山即北山經神困之山黃水溢水出者矣豈神困即以石鼓形似得名亦魏都賦之神鉦益可証山經非不稽之談乎碑又引齊志文宣使人騎駱駝取經函之事又云文宣常自鄴都詣晉陽往來山下故起離宮以備巡幸於此山腹見數百聖僧行道遂開二石室刻諸尊儀因建此寺初名石窟後主天統間改智力宋嘉祐中復更為常樂又云自皇統八年九月乙亥訖天德二年六月甲寅殿成貞元二年正月癸亥始立塑象則記金代修葺之時也其字體有姿致漸與米芾相似篆額亦工

柳修泉池記 大定五年五月立李綸撰王克正書在河內

碑云河內郡之西北有大雄山山之陽數里有唐堯古祠數泉出於祠下南底于沁上下數十里按即今所謂堯池者也其水不知當水經注之何名後人造為唐堯担掌之說甚可笑也

濟源縣寶峯院記 大定十三年五月立正書在濟源

碑為天聖七年楊延方重營棟宇植以松柏大定三年勅賜寶峯禪院而作也

御題寺唐德宗詩碣 大定十六年立許安仁記并書在御題寺

額正書云御題寺唐德宗天章碑下為五律詩一首知年月人名者據黃叔璥中州金石攷也重修中嶽廟碑 大定二十二年十月立黃久約撰郝史正書党懷英篆額在登封

碑述大定重修中嶽廟始於十六年四月丁未絕手於十八年六月戊子二十二年十月庚申制詔臣久約書其事于石按黃久約字彌大東平須城人也金史有傳稱其雋朗敢言性友弟為文典贍云碑作郝史撰尚可識而庚子銷夏記云書者止云臣郝不著其名石又完好非泐也蓋未諦視之党懷英金史有傳稱其工篆籀當時稱為第一童鉦河南府志云中嶽廟按唐韋行儉廟記元魏徙廟于嶽之東南即黃久約所謂舊有廟在東南嶺上者也行儉謂元魏徙廟而黃以為莫知其經始記文偶疏耳至黃謂魏大安徙于神蓋山韋則不及合觀二記則元魏兩徙廟也初徙于東南嶺上又徙于神蓋山所謂東嶺者今廟東南玉案峯也所謂神蓋山者今廟東黃蓋峯也又峻極中峯上傳為元魏中嶽廟遺址是又曾建廟山上矣童鉦字二樹山陰人所修方志典核可觀近今著述之善者

崑崙山長真譚先生題白骨詩 大定癸卯甲子月立程發正書在洛陽

碑上圖譚道士隨一童及枯髑委地形下為題白骨七詩詞甚淺俗後有雲溪菴建皇甫道淵

衆立石譚先生見元史邱處機傳云處機年十九爲全真學於寧海之崑崙山與馬鈺譚處端
劉處元王處一郝大通孫不二同師重陽王真人金宋之季俱遣使來召不赴此卽譚處端也
道藏中有譚先生水雲集三卷亦載骷髏落魄歌

安陽縣乞伏邨重修唐帝廟記 明昌六年六月立趙秉文撰并正書題額在安陽

碑云相之西六十里而遠有聚落曰乞伏帝之祠在焉西挹太行北枕漳水古木森然上閱漢
晉又云相古邑也若殷三甲之居相文王之居美里皆有祠廟載在祠典獨唐帝之祠義若無
所出予按太平寰宇記云永定縣本漢內黃縣地隋開皇十八年改爲堯城縣因堯所居之城
爲名唐末改爲永定縣又云丹朱墓在縣東一里堯之子也攷永定廢縣在今府城東四十里
宋省入安陽縣則其地祠堯實當以此丹朱墓亦在府東南巖邨趙秉文不能遠考故以爲堯
無所出耳南宋金元以來文人多而學人少往往如此獨怪金史稱秉文自幼至老未嘗一日
廢書之說也

緱山詩 承安丁巳十一月立溇南老人撰草書在偃師

詩云緱山突兀上空虛古柏森森幾萬株一自吹笙仙去後乘鸞曾返故鄉無題云溇南老人
卽王若虛也金史有傳考丁巳蓋承安之二年

魏夫人賜靜應廟牒 承安四年五月立正書在河內

此知縣事陳崇祈雨應驗而奏賜題額也牒爲崇寧時所下後有司空兼左僕射左光祿大
夫右丞吳詵銜及押至承安時乃始上石

王大尉奉使齋降御香魏夫人祠紀事碑 泰和元年七月立康國材正書在河內

碑以宋政和八年書金泰和元年立石字大二寸而不工諦視此碑隱隱有字蹟爲金人磨
去重刻此文者凡古陵廟修造之日世俗必以古碑刻新文其有祭告之處尤甚最爲惡習
不意金代有然識字之人庶幾戒此

投簡卜日碑 泰和五年正月立彭珣撰并行書

時珣同王知常奉旨卜日故有此刻

何友直題名 嘉定丙子四月初刻何友直行書在桐柏淮源廟

題云嘉定丙子四月初九襄陽刊石何友直因謁淮源王祠下後旬日歸與數友言別臨行
不竟黷然後會無期謾刻於石不可無紀覺字作竟蓋省筆文又爻之譌也

乾元禪寺泉公禪師塔銘 興定二年九月立樂說甫撰釋性英正書在洛陽

碑文與字頗劣述禪師慧泉俗姓張孝事二親二親既喪遂求出家則其人有可取也又述

弟子十二分骨建塔銘亦云其徒分骨塔於龍門釋氏之流獎甚矣銘以腳與照為韻畢與逝為韻必緩讀腳字畢字二音以從之今北人讀入聲多似去雖是俗音不足為據然漢魏往往有之自有沈約四聲則不合于古韻不通于方語矣

重刻白樂天詩 元光元年九月立賈獻臣正書在濟源

詩為濟源山水好老尹知之久五古一首後題太和五年九月二十六日後云賈獻臣重錄是居易有原刻或失于宋金時也獻臣時遙授昌武軍節度判官

葉令劉從益惠政碑 正大四年八月立趙秉文撰并行書在葉縣

從益官葉有惠政召授應奉翰林文字踰月疾卒秉文為作碑後有悼騷一首字體奇偉可觀趙秉文金史有傳云字周臣磁州滏陽人也登大定二十五年進士第興定元年拜禮部尚書兼侍讀學士同修國史知集賢院事哀宗即位改翰林學士自幼至老未嘗一日廢書文長于辨析小詩精絕字畫則草書尤道勁劉祁歸潛志云趙秉文幼年詩與書皆法子端後更學太白東坡字兼古今諸家學及晚年書大進自號閑閑居士云

濟瀆靈應記 正大五年二月立韓時舉撰并正書梁邦瑞篆額在濟源

碑述葛佑銜命降香浹辰得雨之事稱為濟瀆顯祐清源王按金史禮志云明昌間封濟為

清源王此有顯祐二字是史脫文也

重修濟瀆廟記 正大五年六月立種竹老人撰梁邦瑞正書在濟源

碑為帝遣高佑所電致祭有神物出海領紙吞酒朝闕如謝而作

齊徐州觀察使河南路安撫使孟邦雄墓志 阜昌四年立李果卿撰李肅正書在偃師

邦雄字彥國西京永安人宋靖康建炎間嗣王走江浙乃招集亡命旬月間併萬人號曰義師保全一方力拒羣盜京城留守使司嘉其忠義便宜借補進義校尉歷官至忠州防禦使入齊阜昌三年官至徐州觀察使知河南軍府事西京留守河南府路安撫使馬步軍總管兼管內勸農使明年正月西賊叛逆被執不屈父恩被傷致殞子安世同日被禍贈通侍大夫碑新出土字蹟工秀得虞褚規模良可愛也阜昌為劉豫年號豫以宋建炎四年為金所立故附置于此

元

賜邱仙手詔碣 大祖時立李口顏不花口在汝州

按碑為成吉思皇帝訪聞邱師先生隱山東舊境選差近侍官備輕騎素車邀之因頒此詔也元祕史云成吉思皇帝哈罕成吉思釋為太祖哈罕釋為皇帝邱神仙者名處機元史有傳云

栖霞人自號長春子金宋之末遣使來召不赴歲已卯太祖自乃蠻命近臣札八兒劉仲祿特詔求之處機一日忽語其徒使促裝曰天使來召我我當往翌日二人者至處機乃與弟子十有八人同往見焉然則此卽歲已卯詔也是爲宋祥興二年

勅公禪師塔銘 憲宗八年八月立口至輦換僧從印正書在林縣

碑題憲宗八年卽寶祐六年也云蒙哥皇帝卽位七年蒙哥者憲宗諱生時有黃忽答部知天象者言帝後必大貴故以蒙哥爲名蒙哥華言長生也見元史碑述勅公道行勅公洛州洛水人姓張氏前題云九門山泉老口至輦換

祭濟瀆記 中統元年八月立李國忠撰史芝書丹并篆額在濟源

碑刻銜稱儒生史芝亦前所未聞

少中大夫御史程震神道碑 中統四年七月立元好問撰李微正書李冶題額在偃師

碑云祔於金昌府芝田縣官庄里少中君之新塋按曹植洛神賦云秣馬乎芝田太平寰宇記云緱氏縣芝田鄉在縣北金史地里志河南府興定元年八月日金昌縣有芝田宋名永安貞元元年更

濟祠投龍簡靈應記 中統五年四月立李口國撰劉鐸正書在濟源

碑述真人張誠明設醮投奠靈應之事

許熙載神道碑 至元四年八月立歐陽元撰趙孟頫正書并篆額在彰德府城西北

熙載有壬之父有壬旣貴乃爲父立碑張起巖爲行狀馬祖常爲壙志歐陽元爲此碑二人皆熙載同年進士孟頫字亦極工整是生平經意之作古人書撰碑碣但自書銜無書通家子姪等字樣今人則用之何積習之難反也

重修天壇靈都萬壽宮碑 至元四年十月立口或口撰史天祐正書并篆額在濟源

碑云吉靈都萬壽宮此本唐玉真公主受道登真之所凡文人爲道家作碑志稱登真蓋言死耳後遂謗傳爲升僊謬矣下述張志謹道行及修建院宇之事

紫虛元君廣惠碑 至元五年二月立石瑄撰李德存正書并篆額在河內

碑文甚陋稱唐路敬淳碑云任城魏陽之女脫元字云注子於王禮乃玉札之誤又云淵德豚仁出禮記亦誤以豚爲肫又云亂之以詩下又云銘曰皆無文理其篆額似是符籙凡八字意會其六曰大元口口廣惠之碑予幕中多識篆籀古文之士然此卒莫能辨見其字體之不經也

懷慶路監郡脫來公祀濟瀆記 至元五年九月立郭安貞行書趙初題額在濟源

碑述脫來公禱雨有驗之事文當是安貞所撰

僉憲楊得春靈應記 至元七年二月立蘇棟撰郭居仁行書左世榮題額在濟源

碑爲春祭瀆有葡萄釀塊泛出波面而作也

皇太子燕王香碑記 至元九年二月立李惟深撰并正書在濟源

碑似是磨古刻而重書者橫行有太常寺三字甚方正疑唐碑也

代祀濟瀆投龍簡記 至元十二年三月立袁志遠撰史芝正書在濟源

碑述御也先祀廟投建齋醮之事字甚劣

洛京緱山改建昇仙宮記 至元十五年二月立柱成寬撰張瑜正書并篆額在偃師

碑云府店緱山乃周靈王太子喬仙君飛昇之地也始勅原廟賜號宣天時有前朝就爲觀額廟處仙山之末觀居緱嶺之阿按班固地里志云緱氏有仙人祠水經注云休水又逕延壽城南卽緱氏城也城有仙人祠謂之仙人觀太平寰宇記云緱山縣仙鶴觀在縣東三里當卽漢以來相傳之廟矣續博物志稱天寶中太子陵仙鶴觀每年九月三日夜有道士一人得仙張竭忠爲令不之信陰令二勇士執兵覘之至三更有一黑虎入觀來銜一道士於是申府請弓矢大獵石穴中格殺數虎其觀遂廢爲陵使之居亦此地也碑爲五祖真人令

杜德元就山開教德元與楊德元經營起造而作蓋元時去唐代漸遠人忘虎患而道教復興矣

皇子北安王降香記 至元二十三年正月立傅夢弼正書在濟源

碑述致祭瀆廟甘澍感應之事書法亦不工

望嵩樓記 至元二十四年五月立尙野撰正書在汝州州署壁間

尙野時爲汝州判官因爲此記字亦端雅記稱文大方獨見劉禹錫送家參謀詩有望嵩樓上忽相見遂以爲始建自唐李廷老以望之不見而有汝陽之易南陽府知府王伯堅勸農至此稅駕斯樓云云尙野記之此石出于乾隆辛酉春因修學宮得于土中知州宋名立移置署壁并跋後按宋張耒詩有云臨汝城中春雪消望嵩樓上對嵩堯已披氛露看孤秀更挾春寒上沈寥亦卽謂此樓也樓在今州治西子城內風景甚勝

濟瀆靈異記 至元十四年重九日立王光祖撰并正書柴文煥題額在濟源濟瀆廟

碑記南京路宣慰同知忽辛先莅事聞有恩州劉姓直赴訟庭拜禮其人歿三日復生云見冥官爲誤攝放還早隸等徵問錢物引至南京宣尉司同知平正庫內借錢一百五十貫稱如達陽間同知處禮一百五十拜餉馬百日可償所借錢債於是悉依前語拜禮餉馬還家

亦流俗相傳之事也文與字俱不甚工

馮帖題名 至元二十一年十二月刻馮帖正書在桐柏淮源廟

題云余按覈荆豫至南陽同知府陳君子棋朝請敬謁祠下時至元甲申冬十一月十有八日也中山馮帖題書吏毛倫侍行

加封濟瀆濟源善濟王勅并記 至元二十八年四月立徵良佐正書在濟源

碑云遣元門掌教大宗師輔元履道元逸真人張志仙者道陵之裔也勅上為國書下正書以二月下四月乃記之徵良佐下缺二字云書之敬書疑所缺者乃撰并二字也

宏鼓大師修白馬寺詩 至元三十年九月立商挺撰正書在洛陽白馬寺

詩七古音節琅琅甚可誦也後有奉別龍川大士七律一首

通慧大師塔記 至元三十一年五月立宋天祿正書在汝州

其文駢體後有七言詩句辭甚鄙俚當是市井之所為寫惱為惱尤可怪也

濟瀆靈貺碑 大德三年四月立史芝撰張秉彝正書高凝題額在濟源

碑述劉道真祀瀆得錦幡尊酒之異都穆云濟瀆東池俗傳間能出物以應人之求然率始于三月至四月望而止餘月則否蓋春夏之交泉脈騰沸而濟尤勁疾物隨沸而上予之遊

也默禱于神願出物以彰靈異道士云隆寒水泉不動物不能上予笑曰豈有靈神而畏寒者乎爾姑為我禱久之物竟不能出道士之言始信而世俗所云皆誕妄也

重修太初宮碑 大德四年九月立王道明撰高從謙正書劉懷象額在靈寶

碑述道士張志明屎記文宋真人等興修之事有云尹真人殿前二小石刻一云唐開元二十九年元元降丹鳳樓告云錫汝符在尹喜宅求而得之水際上有天篆文曰千載天寶靈符元宋因受開元天寶之號額為天寶觀今訪其刻亦不得矣

老子故宅十方聖祖之宮碑 大德六年三月立高凝撰王道亨正書在靈寶

元和郡縣志云桃林縣天寶元年于縣南古函谷關尹真人宅掘得天寶靈符遂改縣為靈寶則此縣有尹喜宅非老子宅也碑亦辨其事而云豈尹喜故宅老子著書所也

靈都萬壽宮圖并陰 乙巳年八月立在濟源

碑二格上層為圖下層為披雲宋天師詩咏者為憩鶴臺金蓮泉唐元宗御書額不老泉平陽洞鳴鐘泓橄杖石仙人臺八題及前後二詩無題共絕句十首陰亦二格上層圖一道士下層勅旨云張先生者即志謹也乙巳為成宗大德九年終元之世無乙巳故定以為大德時

漁莊記 大德十年閏正月立陳儼撰趙孟頫行書在安陽

碑云吾雲卿總管韓侯之別墅也去太行東麓三舍洹水界其下號萬金渠折北而東抵相十里而近切東溪百許步即其地也云云洹水今名安陽河萬金渠在安陽西北二十里源出寶山經府城西分注東南溉田世傳魏武所開又云其利可抵萬金故以名也予按鄴故多水利自西門豹始隋唐宋元明因之其在安陽內黃湯陰臨漳武安林縣涉縣者至今往往而有守土官其如何疏濬裨益于民則考古之學通于政事矣

南禪寺粧鑿佛像記 大德九年九月立解澤民撰在汝州

碑為汝州達魯花赤阿的彌試下車之日以愛民為本境內大治施俸金粧鑿釋伽三聖及諸佛像而作也後為元國書如前文無書人名而但云嚴秀刻疑即解澤民并書者也
百里嵩墓碑 大德十年八月立高建撰岳正正書隸額在封邱

碑云封邱縣之東北僅七里有廟焉世以為百里嵩廟又稱廟址即其使君冢坐按太平寰宇記云封邱縣百里嵩墓在縣東七里後漢書高字景山陳留封邱人為徐州刺史時早嵩乃傳車巡部所到屬縣膏雨隨車卒葬于此與碑所稱正合墓今在縣城東五里廟在墓前至今禱雨有驗此碑即因縣尹劉循禱雨靈應而作也廟尚多明時所立碑茲不錄

內鄉縣創建宣聖廟學記 大德十年十一月立暢師文撰并正書成資篆額在內鄉

碑云中元以來社請學師教習童蒙讀誦小學四書此小學者非漢人之所謂小學也朱彝尊云宋儒持論以灑掃應對進退為小學由是今之塾師說文玉篇皆置不問免園冊子專攷稽于梅氏字彙張字正字通而小學放絕焉師文蓋趨逐風氣之語故又痛斥枝章析句箋釋蟲魚欲為治經博士之人按孔子云爾雅以觀于政足以辨言又云多識鳥獸草木之名師文薄有文名何乃與聖人之言相背若此故元明兩代遂少通經博物之士矣

國書二碑 武宗時立在林縣

一碑為成吉思皇帝月可解皇帝薛禪皇帝完澤禿皇帝曲律皇帝宣諭寶嚴寺太平寺僧聖旨後云牛兒年七月一碑上為成吉思皇帝宣諭寶嚴寺乾明寺龍興寺僧聖旨云雞兒年中為國書下為成吉思皇帝月可解皇帝薛禪皇帝宣諭寺僧依著在先聖旨体例聖旨後云狗兒年二月成吉思太祖尊號月可解薛禪完澤禿曲律世祖成宗武宗之謚身後追上也當時國語如此元史月古解作窩闊台泰安府東嶽廟聖旨碑又作月古台完澤禿作完澤篤又作完者都此碑作月可解又一碑作月古解皆聲相近元國語重音不重字故也雞兒年狗兒年之屬元祕史亦悉以此紀歲即十二屬是也以俺代我者音之轉甚麼即只麼亦急讀為什麼當即唐人之遮莫而釋唐詩遮莫者多云儘教疑非予以為皆者字之緩

讀為二音說文云者別事詞也俗或書為這

石堂山麻衣道場重建普濟堂碑 至大二年三月立朱象先撰并正書在內鄉

碑述陳搏隱武當過此山龍君洞從麻衣叟論易之事又云世傳麻衣心易二十四章希夷為之解李壽翁張南軒皆有跋語而朱文公乃以為戴師愈贗作而力辨之又云是書非空言也實用具焉此道士尊崇私說以衒世之計也陳搏一隱者耳世多造作異事以歸之皆史所無史惟載其教種放不娶遂無子此其大失是以吾儒束身名教不肖為瑰異高尚之行以致流俗附會其事損傷風化也

付紫微宮旨碑 至大二年三月立正書在濟源

碑為元國語而月古解皇帝作月古反此字見元人曲譜以為好友之事訓反為惡也

重修天壇碑銘 大朝乙酉歲建子月立李志全撰并正書白志明篆額在濟源

碑述伊陽瑩然子周鍊師住持營建之事紀歲稱大朝已酉建子月蓋武宗至大二年也終元之世更無已酉故定以為至大云

天壇十方大紫微宮結廡殿記 大朝庚戌歲八月立李志全撰錢志口正書在濟源

碑述沁州杜德康及夫人王體善施舍之事云杜侯一門自於長春國師几前親受法訓長

春即邱處機自號也元史有傳紀歲稱大朝庚戌蓋武宗至大三年也

公主皇后付靈都宮懿旨碑 庚戌年五月立正書

碑述靈都宮宗主寧神子張志謹賜廣元真人名號之事庚戌者至大三年也終元之世惟此庚戌故定以為至大時

太易道人書篆碑 至大辛亥二月立上隸書下正書在內鄉

碑上層為圓格言道與性及易理皆不經之談似是而非之論下層橫題云嗣漢三十代天師虛靖先生心說其文或用老莊之言又襍釋氏真如及天堂地獄之說又牽涉吾儒身心勿使須臾離之語蓋是時風氣以釋氏之學談性命之習成矣此尤其妄作者自題內觀養素太易道人書篆而上層所書似正似隸下層竟是正書是并字體亦不辨之人也

重修顯聖廟碑 皇慶元年十月立郭秉仁撰郭淵篆書在闡鄉

碑云神之原廟者按寧州圖經在陽周東西四十里要冊鎮鳳凰山龍安掌湫週迴一百九十步又云唐時有神與本處郭仕廉相符由是廟興又云漢與朝郡俱設署曹唐太宗重修元宗增修按封禪書湫淵祠朝郡地里志朝郡有湫淵祠括地志湫谷水源出寧州安定此其遺制也碑又云是廟者建基於宋復興於聖元即關東全節之行宮蓋闡鄉之祠創始于

宋而非古廟秉仁自云郭令公二十代孫其字不甚工有云元宗以金瓶汲淵又云景龍間復勅內謁者馮翊玉篇瓶是朱切小甕也但無翊字近惟易緯有趾字音止今字書以駘爲恥未知是一字否其寫闕鄉字作闕與今闕字皆爲別體說文闕低目視也从聿門聲宏農湖縣有闕鄉此字以門爲聲玉篇入門部大謬下有闕字云同上俗今印文正作闕字不知世俗何由通作闕也闕亦闕之譌形

洄溪先生遊玉川詩 皇慶二年十月立王公孺撰男竒正書在濟源

詩爲七言律時竒爲懷孟路總管府判官邀其父與趙濟民謁清源祠而作也

古槐圖記 皇慶癸丑立童童寫圖一百五撰并正書在滎陽

一百五時爲達魯花赤述其見郭東古槐殊類老口俗傳漢朝曾來此樹下口有閑閑公詩在焉又述大丞相卜麟吉臺嫡子童童成律詩一章及真形俱寫于壁是以命工模勒其畫將詩刻于石又云自漢至亡金正大禩一千四百二十四禩至皇慶癸丑一千五百二十一禩蓋記漢槐甲子也

古槐詩 皇慶癸丑立童童撰并書在滎陽

詩云龍幡天矯與雷雨虎踞離奇隱鬼神隆準千年成蟻夢空餘古樹老滎濱後題集賢侍

讀學士中奉大夫童童馳驛之河南道經滎邑觀路傍漢朝老槐感而賦此時皇慶元年十一月十九日也一百五稱爲雄章傑句未免譽之過當予以爲蟻夢乃唐時故事今用以說隆準是猶賦昭君詩用蘭麝之病與

重建奉仙觀記 延祐元年五月立劉大明撰姜道安正書并篆額在內鄉

碑記道人王志固王道明前後修觀之事云所謂奉仙觀者古人不徒名也而必有以奉其所以爲仙者而取焉則是時志乘久已缺畧矣前又述歷代仙真之名文甚淺俗

投龍簡記 延祐元年八月立周應極撰趙孟頫行書郭貫篆額在濟源

碑爲帝命張留孫建醮復命集賢司直周應極投簡濟瀆而作也留孫者龍虎山三十九代張真人嗣成之徒信州貴溪人元史正一天師傳稱至元十三年從天師張宗演入朝遂留侍闕下又稱卽命留孫爲天師留孫固辭不敢當乃號之上卿十五年授元教大宗師大德中加號元教大宗師同知集賢院道教事武宗立陞大真人知集賢院位大學士上尋又加特進進開府儀同三司加號輔成贊化保運元教大宗師至治元年十二月卒今碑稱爲特進上卿元教大宗師志道宏教沖元仁靖大真人與史不甚合未知何故張真人之尊號自宋元始乃至官其父旌其鄉亦已過矣元史又有世祖嘗命取其祖天師所傳玉印寶劍觀之曰果有神明之

相等語攷龍虎山印文曰陽平治都君印茅山印文曰九老仙都君印皆九曲文茅山印乃宋徽宗賜道士劉混康者有碑刻可証龍虎山印篆文玉質正與之同知為一時所賜無疑今世傳茅山印為卞和玉李斯刻何異以龍虎山印為道陵所傳漢物邪因元史之言失實故附記于此郭貫元史有傳云至治元年為集賢大學士追封蔡國公謚文憲精於篆籀當世冊寶碑額多出其手

投奠龍簡記 延祐二年十月立行書隸額在濟源

碑無書人名為特命特進上卿真人張留孫建醮及遣侍讀學士李侗投簡濟瀆而作也字蹟與元年投龍簡記正同其為趙孟頫書無疑

重修濟瀆廟碑 延祐三年九月立王公孺撰王笱正書蕭珍題額在濟源

碑為太后遣使祭廟及命總監懷孟路事臣混沃耳不花修完祠宇而作也其文既美無故實字亦甚劣文中不花字一又作不華者元時重音而不重字也故禪經譯本文字各異碑字空缺處有監察御史藍田題名隸書

重修宣聖廟記 延祐四年五月立宋混撰韓沖正書林鶚篆額在偃師

碑云商有二毫昔成湯所都口號曰殷即西毫之地按書序云湯始居亳從先王居鄭康成注

云毫今河南偃師今有高莊在治西五里即高辛故都也皇甫謐好為異論以為湯都當在穀熟不當在偃師穀熟即今商邱乃湯始居之地後遷于偃師耳謚知其一失其一矣碑稱武王伐紂築城于此息偃戎師後置縣事因名曰偃師說與通典元和郡州志合偃師故周縣徐廣注史記云周比亡之時有之

元刻比干銅盤銘 延祐五年正月摹篆書在汲縣墓上

薛尚功鐘鼎款識云唐開元中偃師縣土人耕地得此盤篆文甚奇古張邦基墨莊漫錄又云政和間求三代鼎彝器遣人于鳳翔府破商比干墓得銅盤徑二尺餘中有款識一十六字按諸書傳比干墓在汲縣而太平寰宇記云偃師縣比干墓在縣西北一十五里疑已譌傳鳳翔之墓尤謬其文頗似李斯傳國璽縣密茂美當是秦漢人所為亦必非商物也童鈺稱舊偃師志云何比干汝陰人漢武時廷尉墓中以銅盤為誌出于唐開元中後傳自汝帖延祐間衛輝路學正王公說摹石推官張淑記之明萬歷十五年周思宸又重摹上石皆在汲縣

追封隴西郡伯李彬碑 延祐五年四月立元明善撰趙孟頫書在許州

按碑是李謙追封其父彬并述事刻石之辭彬隸大將軍岳珍戲下從入宋既二年大旗南

指岳珍率德安人十許萬來歸元帥第功以爲計口都尉彬之行似無可述豈爲戲下將固當從人指授不得以入元爲嫌邪戲下卽麾下說文云戲三軍之偏也从戈盧聲史記正義引許君注注南子云戲大旗也此猶用古字今人則見而疾之矣

聖旨頒降御香記 至治二年二月立僧智明撰鮑安仁正書并題額在濟源
其文與字頗劣

東嶽行宮碑 至治二年十二月立陳霄撰芮秉彝正書薛士廉題額在汝州

碑述修廟之事云始構之由漫不可考獨有慶歷五祀孔叟所作重修碑刻在焉又云唐宋以還封勅之隆至與天子等逮我聖元卽其故封復加大生之號如碑云云則是宋元以來卽所在有東嶽行宮矣東方生道家因作爲東嶽注生之說民樂得而祠之故立廟無限極周天大醮投龍簡記 泰定元年五月立正書在濟源

碑爲詔吳全節等設醮蔡天祐等投奠而作也

代祀禱雨感應記 泰定二年三月立董良弼撰正書在濟源

碑述遣劉紹祖及定定致祭之異

大龍泉寶雲寺碑 泰定二年七月立趙孟頫撰釋德謙正書并篆額在汝州

碑云寺之經始莫詳何代父老皆云昔光武憇此人馬渴之俄有清泉沸湧而出後人建寺於此因以名焉其事甚古而不見史籍蓋僧人造作此說以街俗者矣字甚工整可觀

龍飛祀瀆海記 天歷元年九月立黃奎撰并行書在濟源

碑述帝遣范完澤及奎致祭之事

淮源廟鉄獅子識 天歷二年二月刻行書在桐柏

題云唐州口卿口口爐口况文炳口發虔心於桐柏山淮瀆廟內鑄造獅子一隻口充鎮口

大元天歷二年二月

李黼題名 天歷三年刻正書在桐柏淮源廟

題云天歷三年春天子以早荒致誠嶽瀆大常同簽禿堅里不花賜進士及第翰林修撰李

黼代祀祠下靈貺昭荅普我惠澤

張策題名 至順三年七月刻正書在桐柏淮源廟

題云奉詔代祀淮靈牲肥酒苾禮嚴祀恭瞻望明神髣髴如在也是亦可書有元至順三年七月十二日前監察御史張策公畧謹識國子伴讀王良貴實預其行

長明燈記 至順癸酉正月立僧福佑撰正書在白馬寺

碑記陝西行御史臺大夫瑀瑤博華造寺施鈔充長明燈費之事字亦有姿致攷癸酉為元統元年至順之四年也

洛京白馬寺祖庭記 至順四年九月立僧文才撰正書在白馬寺

攷至順無四年至順之四年即元統之元年也字甚工麗驗其筆蹟實趙孟頫書

偃師伯王輔嗣墓碣 元統二年十月立吳炳隸書在偃師

題云偃師伯王輔嗣之墓按水經注載王陸詩敘機初人洛次河南之偃師時忽結陰望道左若民居者因往逗宿見一少年姿神端遠與機言元機服其能而無以酬折前致一辨機題緯古人綜檢名實此少年不甚欣解將曉去稅駕逆旅姬曰君何宿而來自東數十里無郵落止有山陽王弼墓機乃怪悵還睇昨路空野藎雲攢木蔽日知所遇者審王弼也太平寰宇記云墓在縣南二里一統志云在縣城東今有題碣可証或宋治非今治也

降香祀碣 元統三年五月立于克紹撰李景參正書鮑安仁題額在濟源

碑以題額人居前次書人次換人金石未有之例

重建清虛宮碑 元統三年七月立伯建爾撰趙初正書在濟源

碑有云王屋山下拒洞門十三里唐太中九年三洞柳元君碑今訪不可得矣

濟瀆重建靈異碑記 後至元五年九月立郭安貞撰進齊建德祖正書仇濟篆額在濟源

碑為忽辛先泄事有劉姓為冥官誤攝放還而作也即後至元二十四年重九日正光祖刻

石所記之事錢少詹事大昕潛研堂金石跋考此甚悉今不書

付陽臺宮旨碑 至正元年五月立正書在口口

碑為元國語有云成吉思皇帝月闕台皇帝薛禪皇帝完澤篤皇帝曲律皇帝普顏篤皇帝潔堅皇帝護都篤皇帝亦憐真班皇帝攷林縣碑月闕台作月可斛完澤篤作完澤禿泰安府有泰定開東嶽廟聖旨碑月闕台作月古台普顏篤作普顏都潔堅作法堅又有至正碑完澤篤作完者都潔堅作格堅護都篤作忽都禿元史月闕台作窩闕台護都篤亦作忽都篤亦憐真班作懿璘質班蓋釋音本無定字可悟聲轉之法也

濟源縣重建寶峯院碑 至正三年五月立楊宗瑞撰并正書法洪篆額在濟源

碑述秀公建立佛殿之門等事餘與大定碑同

天壇山興國大陽臺重修玉皇殿記 至正四年閏二月立張琬撰劉估父正書韓應芳篆額在口口

碑字亦不工有云古道觀道流相傳以為始建于唐司馬承禎題曰興國大陽臺萬壽宮其

東有燕羅子仙洗參井右有承禎鍊丹爐考古蹟者亦有取焉

重刻延熹六年桐柏淮瀆廟碑 至正四年三月立吳炳隸書在濟源

碑後有記畧云漢延熹六年南陽太守刻石頌德風雨剝食其僅存者漫不可讀昔人嘗正書是文勒石廟側間有謬誤識者病之至正四年杜君昭同知唐州既修祠廟因以重刻舊碑謀諸僚佐以吳炳嘗習漢隸請重書舊文口石乃以隸釋更定其誤是漢碑尙存但多漫滅後人又有正書碑炳又摹漢隸而書此碑也水經注云桐柏大復山南有淮源廟廟前有碑是南陽郭苞立又二碑並是漢延熹中守令所造文詞鄙拙始不足觀今檢碑文亦不甚拙然即酈道元所見也吳炳云有謬誤之碑即隸釋所云此碑又有一正書者如華蓋誤作萃豐晝夜誤作立式凡十數字今亦不存顧炎武金石文字記有漢桐柏淮源廟碑八分書云洪氏隸釋載此碑缺五字今拓本字畫完好而乏淳古之氣蓋唐人重刻者據朱長文碑帖考云是釋曠書釋曠開元時僧云云是誤以元吳炳重刻碑為唐人書蓋近時搨工往往割截碑前後重刻年月書撰人名以充漢時原刻炎武亦為所惑予聞漢碑仆地即在吳炳碑之旁尙有數字可辨屢飭守令打本搜訪不得恐又為近時修廟取作柱礎矣光州孫叔敖碑顧炎武亦見拓本今求之云已湮沒甚可惜也吳炳見書史會要云字彥輝汴人身安

賦畝朝廷三聘不起工篆書予記憶其所書尙有河南行省增修堂廡碑記今求之不得云

洪适又謂此碑奉祀齋絜字書無齋字案說文有齋字云緬也蓋齋衰本字借音為齋絜耳

麻衣子神字銘 至正六年冬立字述魯泐撰男字述魯遠正書王睿篆額在內鄉

碑述麻衣子姓李名和以穆帝昇平元年春二月十有五日生及唐貞觀十三年天子制表

山峯等號有云南陽貢士李珩填諱者子書父文于没月之後也字亦整飭有唐人格調

孟芾題名 至正七年正月刻正書在桐柏淮源廟

題云至正七年歲在丁亥正月十有二日唐州知州東海孟芾敬拜祠下偕行者江東鄭文

曾棗陽黃珍也前又題云至正七年二月廿有三日南陽府同知節齋因奉御香拜謁祠

侍行者唐州知州孟芾提舉張眾家奴府吏王從敬也

哈利魯虎口赤墓碑 至正七年八月立趙孟頫撰舉出鉅臺書并篆額在汝州

按碑稱哈利魯父八黑馬從四太子南伐金之殄滅公功為多四太子者太祖第四子拖雷

後追謚睿宗景襄皇帝元史有傳碑又云中原平鎮汝州子名虎口赤授臨清御河運糧官

願効力邊陲授金符進階忠翊校尉南劍翼管軍千戶所達魯花赤乃踰閩嶺蒞治所卒歸

葬汝州東吳氏堡之原追封梁縣男碑文不甚俊似非孟頫真筆舉出鉅臺墓字甚奇不知

是舉字否也

濟瀆潮賜記碣 至正九年四月立陶黃庭撰馬道蘊正書在濟源

碑述潮賜出綉鞋諸物文與字甚劣當是市井所為

濟瀆廟塑象題名記 至正九年五月立郝正撰并正書在濟源

碑有謹將會首芳名以勒于石云云若今市井甲乙簿字亦甚劣

重修靜應廟碑 至正十一年五月立唐顯宗撰并正書崔文定篆額在河內

碑載列仙傳魏夫人事甚詳文與字俱不工篆額尤謬

三蘇先生祠堂記 至正十二年口月立曹師可撰賈彬正書楊允題額在郊縣

文稱東坡墓在鈞臺鄉上瑞里又云至順間禮部行文下郊縣于墓之東南十里薛店樹石

以表之曰眉山兩蘇先生神道又云郊縣大德甲辰置祠為縣尹楊公建名字無攷攷史子

過傳云軾卒于常州過葬汝州郊城小峨眉山遂家穎昌

監郡公阿蔡雅實禮感雨記 至正癸巳立元忠孝撰鄭願篆額在濟源

碑述感雨之異後別附三行述阿蔡雅禮之德政至正癸巳為十三年也

祀濟瀆神應記 至正十七年十月立趙恒撰并正書李炳奎篆額在濟源

碑為太尉丞相太不花遣官致祭有池出清醞一樽之異而作也字亦韻秀

祀瀆記碑 至正二十二年八月立田文舉撰鑄僧正書陳貴篆額在濟源

陳貴篆下無額字亦金石未有之例

元付靈都萬壽宮榜 正書在口口

文為元國語有印記花押若今時告諭矣

中州金石記卷五終

涇川邑後身

中州金石記五

五

中州金石記後序

尙書弇山先生成關中金石記之後二年奉
命調撫河南又三年而復有中州金石之著自是秦涼之寶墨荆豫之貞珉搜采靡遺殆稱觀
止亮吉于金石之學素寡究心而輿地之嗜幾于成癖暇日嘗假先生碑數百通校史傳闕遺
其間得史文之誤者十之三以史文正碑石之失者亦十之一繼又周覽大河縱觀崇嶽南遊
乎汝潁北極乎殷魏又悟乎金石之失有卽可以金石正之者如大坯之山尙書有洛汭之文
爾雅標一成之目而唐天寶中河北黜陟使碑以坯爲坯遂舉黎陽縣南山當之雖說由臣瓚
而義無左證何則昔日一成今乃巖巖之石嶺昔日洛汭今乃湯湯之淇水必謂臣瓚之云足
據則周公文命之言未可憑也惟晉灼漢書音義黎陽縣下云黎山在其南河水經其東其山
上碑云縣取山之名取水之陽以爲名固知魏晉以前無有以黎陽南山爲大坯者矣又汲縣
近代比干墓碑稱酈道元水經注北魏時墓前石銘云殷太師比干之墓夫未蒙其寵而先有
是稱此則厚誣古人取譏來哲惟唐李翰碑云貞觀十九年太宗東征師次殷墟下詔追贈殷
少師比干爲太師謚曰忠烈固知飾終之典遠逮夫貞觀崇號之加無闕于拓跋必炫其該博
信此魯魚是謂生被實禍沒蒙虛稱非後儒之無學卽前賢之不幸也若夫瀆陽之爲慎正以

永平四年之印成皋之爲臯見于建武中葉之章雖始存終軼而此是彼非是知前之樂石足以訂來刻之譌昔之吉金亦可糾近鑄之失有裨于實學不少也近者圓石出洛陽而知王伯輿爲祔葬殘本藏太室而知堂谿典字伯并昨馮戶部敏昌遊王屋之山于河內得司馬昇墓誌銘武進士億行鞏洛之野于董家邛得姜纂造象記求之昔人皆未著錄蓋好古之至川嶽鑿其誠購奇之心球琳逾其價固不必投文清泗搜羸秦已失之金移檄陽侯訪太學久沈之石而所得既如此矣亮吉按魏司馬昇碑曾祖彭城王祖荆川云云而知晉史列王之傳缺略實多又校齊姜纂記云大統元年太歲乙酉九月庚辰朔而知北齊後主之編干支亦誤未嘗不申紙百回求其墮義面壁竟日取悟一隅儔類以此而疏寒暑因之而變也昔者戴淵之涖州兼司兗豫近則田公之作督亦統山東先生倚畀之隆倘同茲例庶幾絃歌有暇讐闕里之碑旌麾所賁訪耶臺之刻自是而天下之大觀庶畢萃于一室矣受業陽湖洪亮吉撰

